



ह्रीवसुब्रवादेवीया सांझुनिवा दृष्टतुमि

चमि

हेमराज शाक्य

पिकाम्ह

भीमराज शाक्य (बाबुशाहेव)

श्री वसुन्धरा देवीया सांस्कृतिक पृष्ठभूमि



चवमि
हेमराज शाक्य

पिकाम्ह
भीमराज शाक्य (बाबुसाहेब)

पिकाह्ः

भीमराज शाक्य (बाबु साहेब)

गुजिवाहाः, वसुन्धरानती, यल ।

प्रकाशन मिति:

बुद्ध सम्वत् २५३७

नेपाल सम्वत् १११४, श्रीपञ्चमी

विक्रम सम्वत् २०५०

ईस्वी सम्वत् १९९४

व्याक्व अाधिकार चवमियाके

प्रथम संस्करणः १०००

मूः २५/-

थाकूः

संकटा प्रेस

टेवहाः, येँ ।

फोन नं. २२८२०८



श्रीवसुन्धरादेवी - स्तुति

दिव्यरूपी सुरूपी च सौम्यरूपी वरप्रदा ।
वसुधरी वसुधारी च वसुश्री भीकरीवरा ॥
धरणी धारणी धातृ शरण्या भक्तिवत्सला ।
प्रज्ञापारमिता देवी प्रज्ञाश्री बुद्धिवर्द्धनी ॥
दहनी मारणी चण्डी शवरी सर्वमातृका ।
कृतान्त-त्राशनी भीमा कौमारी विश्वरूपिनी ॥
तथागती महारम्या वज्रिणी धर्मधारिणी ।
मातरी सर्वबुद्धानां रत्नधात्वेश्वरी तथा ॥
शून्यता भावनादेवी भावना भावविवर्जनी ।
नमस्ते तु महादेवी सर्व-सत्त्वार्थ - दायिनी ॥

—वसुन्धराकल्पोद्भूतम्

समर्पण

गुलिनं श्व त्रिधातु भुवनस बिज्याना चर्विपि
भगवती आर्य श्री वसुन्धरा देवी प्रति
गौरवान्वित जुया श्रद्धा भक्तिपूर्वक
उपासना आराधना साधना
याना वंषि व थिति, रीति, गुथि
तया थकूषि सम्पूर्ण श्रद्धालु
भक्तजनपिगु सुख समृद्धि
व शान्ति कामना यासै
श्रद्धाञ्जलि द्वहलपा
चवनागु जुल
अस्तु ।



जिगु धापू

यलया महायान बौद्ध धर्म, संस्कृति, लिपि व कलाया विशेषज्ञ श्री हेमराज शाक्यजुया 'वसुन्धरादेवी'यात कया च्या बिज्यागु सफूया पाण्डुलिपि ब्वना थःगु धापू पाठकवर्गपिनि न्ह्योने तयेखँगुलि जिथेंजाःह्य अल्प ज्ञानीयात तस्सकं उत्साह प्राप्त जुया च्वंगु दु ।

राग, द्वेष व मोहरूपि सांसारिक बन्धनं पिकया जीवन व मरणया चक्रं पिहाँ वयेगु लँपु चतुरार्य सत्य, प्रतीत्य समुत्पाद व आर्य अष्टांगिक मार्ग न्ह्यब्वया बिज्याम्ह सम्यक् सम्बुद्ध शाक्यमुनियागु उपदेश कथं थः जक मखु, सकल दुःखी प्राणीपिन्त नं उपकार व उद्धार यायेगु बोधिसत्व आदर्शयात महाकरुणाया प्रतीक स्वरूप आर्यतारा, प्यम्ह योगिनीपिं नापं वज्र अर्थात् शून्यताया प्रतीक कथं पञ्च बुद्धपिनिगु मूर्तरूप दयेका साधारण जनतां थुइगु कथं बुद्धया उपदेशयात छेलेगु ज्याय् करुणाया प्रतीक कथं वसु अर्थात् संसारयात थःह्य कय्पुया संसारे च्वंपिं प्राणीपित माःगु ज्ञान, नसा तिसा इत्यादिया प्रतीक कथं पूर्ण कलश ज्वना स्वपा खाःया प्रतीक कथं अनित्य, दुःख व अनात्मभाव थुइका कनक वर्णाया थःगु खाः पिब्वया सकलसितं प्रति पालन यानाः बिज्याम्ह वसुन्धरा देवीया महत्व नेपालय् गुलि दु धयागु खँ पं. श्री हेमराज शाक्यजुया थ्व पुस्तकं बोलाक केना च्वंगु दु ।

“अत्ताहि अत्तनोनाथ” धका भगवान् बुद्ध कना बिज्यागु उपदेश अर्थात् थःगु मुक्ति थमं हे यायेमा धका प्रमाणित यायेत वसुन्धरा व्रत दना तरे जुया वंम्ह निम्बदेवी व वसुन्धरा देवीया व्रतयागु, स्वाँ क्वखा इत्यादी कुचा कुचा याना अपमान याम्ह चूतदेवीं नरकबास लाना दुःख

स्यूगु बाखं महायान बुद्ध धर्म सारांशया प्रतीक कथं नेपाःयापि बौद्धतर्से
कया च्वंगु खः ।

ह्लियाह्लिथं तनावना च्वंगु नेपाःया बौद्ध संस्कृति विश्वया बौद्ध
विद्वान्पिनिसं संसारयागु द्रगू अत्यन्त महत्वपूर्णगु वैज्ञानिक संस्कृति
धका अध्ययन व अन्वेषण याना च्वंगु इले पं. श्री हेमराज शाक्यजुं
महायान बौद्ध धर्मया अतिकं महत्वपूर्णम्ह वसुन्धरा देवीया विशुद्धि,
मुद्रा व भाव अभिव्यक्तियात कया नेपाःया थाय् थासय् प्रतिस्थापित वसु-
न्धरा देवीया मन्दिर व भूतियागु अनुसन्धानात्माक विवरण व विश्लेषण
श्व ग्रन्थय् दुगुलि पं. श्री हेमराज शाक्यजुं नेपाःया बौद्ध संस्कृति रक्षा
यायेगु ज्याय् साप हे तःधंगु योगदान यानाबिज्यागु दु धैगु जिगु धापू दु ।

पं. श्री हेमराज शाक्ययात दीर्घजीवन नापं आरोग्य नं प्राप्त जुया
थन्यागु अतिकं महत्वपूर्ण अनुसन्धान ज्याय् सदां संलग्न जुये फयेमा
धका वसुन्धरादेवीयाके फवना च्वना । अस्तु ।

मुनयश्री मिश्र संस्कारित
धम्पि महाविहार, यल ।
श्रीपञ्चमी, २०५० साल

प्रा. आचाराम शाक्य

चमिया थःगु खँ

भौगु जन्मभूमि ऐतिहासिक तीर्थ, उपतीर्थ पर्वत चाहुलाच्वंगु पुण्य-भूमि च्वापुगुंया ववसं अवस्थित श्री स्वयम्भू महाचैत्य विराजमान जुया च्वंगु बुद्ध जन्मभूमि, श्री सम्बरमण्डलाकाररूपे परिणत जुयाच्वंगु अनेक देवीदेवतापिन्सं बास याना च्वंगु अति पवित्रगु “नेपाल मण्डल” नामं अतिकं प्रसिद्ध जुयाच्वंगु जुल ।

थुगु नेपाल मण्डलया कायवाक्चित्त स्वरूपं प्रमुख अंग रूपे परिणत जुया च्वंगु स्वनिगल (यें, यल, खप)या निर्माणशैली आकार प्रकार बिचाः यानाः स्वत धाःसा थन धार्मिक, सांस्कृतिक, कलाकौशल एवं पुरातात्विक दृष्टिकथं अत्यन्त महत्वपूर्ण व गौरवमय इतिहास साक्षि दइच्वंगु थाय् खः ।

थन आदि कालनिसें बास यानाच्वंपि, प्रतिष्ठा याना तःपि लोक आस्था व प्रतिष्ठा दइच्वंपि गुलिनं लोकप्रियपि भगवती, काली, भवानी, दुर्गा, तारा, सरस्वती एवं मातृकागणपि विद्यमान जुयाच्वन । अमिगु इवले भगवती आर्य श्रीवसुधरादेवीया थःगुहे गौरव, महत्व व विशेषता दु, स्थान दु ।

थःगुहे विशेषता व गौरवमय इतिहास पृष्ठभूमि दुम्ह, लोकआस्था प्रतिष्ठा युक्तम्ह सायद अन्य देवीपिन्के दुर्लभ धयां अत्युक्ति जुईमखु । थुकिया प्रमाण स्वरूप प्रस्तुत पुस्तकस बिभिन्न विषय कया थुकी उल्लेख याना बियागु जुल । थुगु विषय कया प्रस्तुत पुस्तकया इवले थःगु अल्प-बुद्धिचाछि न्येगुलि मयाक विषय वस्तुयात कयाः संक्षिप्त रूपं थुकी समावेश याना बियागु जुल ।

थुथास छगू हर्षया खँ थ्व खःकि- दिव्य दिवाकर संस्कारित श्री वैश्रवर्ग महाविहार गुजिबाहाःया छम्ह कुलपुत्र जिम्ह हितचिन्तक पासा श्री भीमराज शाक्य (बाबुसाहेब) जुया श्रीमती कृष्णकुमारी व काय्-भाजु राजेन्द्र, महेन्द्र व सुवर्ण, म्हाय्मैजु लक्ष्मीशोभा, रत्नशोभा आदि सकल परिवारया सद्धर्म चित्त उत्पत्ति जुयाव थःगु निवास स्थानस आर्य-श्रीवसुन्धरादेवीया कलात्मक धातुया मूर्ति प्रतिष्ठा जूगु शुभउपलक्षस विधिवत् वसुन्धराव्रत गातिला धलँ दंका, वयां सतिखुन्हु भाद्रकृष्ण चतु-थिया दिनस वाद्यवाद्यन सहित उत्सव यानाः यलव्यापि वसुन्धरा पूजा न्यायेका बिज्यागु जुल । थुगु किसिमं वसुन्धरामूर्ति स्थापना, वसुन्धरा व्रत व वसुन्धरा पूजा न्यायेका जकनं सन्तोष मजुया अज्ज हानं वसपोल वसुन्धरादेवीया महिमा व प्रशंसाकीर्ति प्रकाशन यायेगु दृढसंकल्प यानाः प्रतिज्ञा याना बिज्यागु जुल । थ्वहे शुभ प्रतिज्ञाया साकार रूप थुकिया दसु थ्वहे सफू जूगु जुल । थ्वहे सन्दर्भे वसपोलयागु विशेषं अनुरोधयात सहर्ष स्वीकार याना थुगु सफू च्वया बियागु जुल ।

जितः धायेमास्तिवो थुगु सफू थौं तकया दुने वसुन्धरा सम्बन्धी गुलिनं ध्वाना आखलं पुस्तक-पुस्तिका प्रकाशन जुल, उगु इवले प्रस्तुत पुस्तक थःगुहे विशेषता व महत्वपूर्ण जुई धँगु जि भाःपिया ।

तसर्थ वसपोल श्रद्धालु दानपतियात जिगु दुनुगलनिसें हादिक सहस्र धन्यवाद व साधुवाद बियाः कृतज्ञता ज्ञापन याना च्वना । लिसें थुगु वसुन्धरायागु सफू प्रकाशन याःगु पुण्यानुभावं वसपोलयात ननानं वसु-न्धरायागु सुदृष्टि प्राप्त जुया आयु, आरोग्य, जन धन, सुख समृद्धि परिपूर्ण जुयेमा धकानं आशा याना । आशा दु थथे हे मेमेगु धार्मिक सफूत प्रकाशन यायेगुलिइ हानं हानं दानशील भावनास न्ह्यलुवा जुये फयेमा ।

थुगु पुण्य कार्यस सहभागी जुयाः हनेबहःम्ह पासा श्री मङ्गलमान शाक्यजुं वसुन्धरायागु कलर फोटो तस्वीर समर्पण यानाः सहयोग प्रदान यानाः बिज्यात । थथे हे आदरणीय प्रो. श्री आशाराम शाक्यजुं अमूल्य समय बिया महत्वपूर्ण मन्तव्य च्वया सहयोग याना बिज्यात । थुगु

रूपं प्रस्तुत पुस्तक प्रकाश निम्ति म्हाय् मय्जु सुश्री हिराशोभा
नं सम्पूर्ण प्रेसकपि च्वया ग्वहालि याना बिल । थुगु कथं थुगु सफू तयार
यायेया निम्ति प्रेस सम्बन्धी ज्याखँय् आवश्यक सहयोग बियाः ग्वहालि
याना बिज्यापि पासा पं. श्री पूर्णरत्न बज्राचार्य व पासा श्री छत्रबहादुर
कायस्थजु खः ।

च्वये न्ह्यथनापि सकल सहयोगी मित्रवर्गपिन्त यक्व यक्व सुभाय् व
भित्तुना देछासँ धन्यवाद बियाच्चना ।

थुगु सफू हथासं च्वयागुलि गनं गुगु थासय् द्वँ विद्वँ जुलवाःसा
विज्ञ पाठकपिके क्षमा पवना च्वना । यदि थुगु सफूया आलोचना व
सुभाय दत धाःसा नं सहर्ष स्वागत याना च्वना ।

थुगु पुस्तक च्वयागु व प्रकाशन जूगु कुशल मूलद्वारा प्राप्त जूगु
पुण्यानुभावं थुगु लोके वसुन्धरायागु शासन अभिवृद्धि जुया सम्पूर्ण
प्रकारया दारिद्र दुःख शान्त जुया सुनं मनुष्यपि दुःखी पापी मजुयेमा ।
अन्तस सर्वसत्त्वप्राणि सम्बोधिज्ञान लाभ याना काये फुपि जुयेमाः । सर्वत्र
सर्वदाकालं सर्वथा मङ्गलसुख शान्ति प्राप्त जुयेमा । अस्तु ।

श्रीपञ्चमी
ने. सं. १९९४

हेमराज शाक्य
ललितपुर महाबौद्ध, थैना
जयधीविहार
फोन नं. ५२३२५०

प्रकाशकया थःगु उद्गार

भीगु नेवाः बौद्ध समाजया अतिकं नांदम्ह संस्कृतिविद्, पुरातत्त्व अनुसन्धानकर्ता, लिपि विशेषज्ञ पं. श्री हेमराज शाक्यजुं थुगु बुद्धजननी आर्य श्री वसुन्धरा देवीयागु महत्व व गौरव प्रति ध्यान आकर्षण यासे थःगु स्वास्थ्ययात तकनं च्यूता मतसे तस्सकं परिश्रम याना वसुन्धरा सम्बन्धी ऐतिहासिक, धार्मिक, सांस्कृतिक एवं पुरातात्त्विक स्थलगत निरीक्षण याना अध्ययन अनुसन्धान याना च्वया बिज्यागु थुगु सफू जुल ।

गुलिनं वसुन्धरा सम्बन्धी च्वसु, चिनाखं, बाखं पुस्तक-पुस्तिका प्रकाशन जुल । परन्तु थुगु किसिमं विविध पक्षयात कयाः अनुसन्धानात्मक दृष्टि थौं तकया दुने सुनानं च्वया पिथंगु खने मदुनि धायेदु । थ्व भीगु धार्मिक सांस्कृतिक क्षेत्रय् महत्वपूर्ण उपलब्धि जूगु दु धैगु जि भाःपिया ।

परन्तु हर्षया विषय खः कि- थुजागु महत्वपूर्णगु गौरवमय कृति प्रकाशन यायेगु मुअवसर जितः प्राप्त जुल । थुकिया लागि जि थःत तःधंगु हर्ष व गौरव तःयेका च्वना । अज धाथें धायेगु खःसा थ्व छगू जिगु लागि सौभाग्यया विषय खः ।

जितः धायेमास्ति वो कि- वसपोलं थुलितक परिश्रम यानाः, दुवाला च्वया बिज्यागुया प्रतिफल पारिश्रमिक तकनं इच्छा मयासे केवल वसुन्धराया प्रति श्रद्धा भक्ति अभिप्रेरित जुया थुगु “वसुन्धरा देवीया सांस्कृतिक पृष्ठभूमि” नामक ग्रन्थ च्वयाः जनसमक्ष प्रस्तुत याना बिज्यागु जुल ।

आशा दु थुगु ग्रन्थ निर्माण जूगु पुण्यया प्रभावं विद्वान् हेमराज शाक्यजुया सदां सुस्वास्थ्य व चिरञ्जीवी जुया च्वनेमा, लिसें वसुन्धराया रश्मिया निभालं सदां खया च्वनेमा धका शुभकामना व्यक्त यानागु जुल । अस्तु ।

प्रार्थीः

श्रोपञ्चमी

भोमराज शाक्य (बाबु साहेब)

ने. सं. १११४

गुजिबाहाः, वसुन्धरानि यल ।

धलःपौ

क्रम ल्याः	विषय	पौल्याः
१.	श्री वसुन्धरा देवी उत्पत्तिया न्ह्यखँ	१
२.	वसुन्धरा तीर्थ स्थान	२
३.	वसुपुर	३
४.	धनद्वं चीबाहाः	३
५.	वसुन्धरा द्वं	३
६.	तिष्ठुडया कलशाङ्कित अभिलेख	४
७.	ईदेया वसुन्धरा मूर्ति	४
८.	क्वहितिया प्राचीन कलश	५
९.	तुकंबाहाः चैत्यया प्राचीन कलश	५
१०.	श्रीघः, न्हूघः, नघः	५
११.	जलकुम्भ देवी	५
१२.	ये न्हूसडकया कलश	६
१३.	भीगु राष्ट्रिय मुद्राय् कलशया स्थान	६
१४.	राष्ट्रिय अभिलेखालयया छगू ग्रन्थपुष्पिका	७
१५.	स्वप लायकूया छगू शिलालेख	७
१६.	चित्र संग्रहालयया वसुन्धरा पौबाहाः	८
१७.	बूबाहाःया छगू शिलापत्र	८
१८.	मंगः लायकूया अन्नपूणदेवी	९
१९.	यतंमातंया छगू भित्ती चित्र	९
२०.	युगभेद वसुन्धराया स्वरूप	९

२१.	वसुन्धराया प्यंगू स्थान	९
	प्यम्ह भगवान्, प्यम्ह जोगिनी, प्यम्ह करुणामय, प्यम्ह सरस्वती, प्यम्ह वाराही, प्यम्ह गरुश, प्यंगू न्हसिकाप, प्यंगू गुफा, प्यम्ह नारायण, प्यम्ह मलः, प्यंगू दू ।	
२२.	प्यम्ह वसुन्धराया स्थान	११
२३.	बुद्धप्रति वसुन्धरा साक्षि	११
२४.	स्फटिकया कलशपूजा गुथि	१२
२५.	वुंगद्यःया रथजात्रास कलशयुक्त धर्कि	१४
२६.	वसुन्धरा जात्रा	१४
२७.	वसुन्धराया नामं नखः चखः	१४
२८.	ज्येष्ठ शुक्ल षष्ठी	१५
२९.	असारया सिन्हाज्या	१५
३०.	पालिजा स्वांया महत्व	१५
३१.	भाद्रकृष्ण तृतीया गातिला धलं	१६
३२.	आश्विन शुक्ल सप्तमी कूछिभव्य	१७
३३.	कार्तिक कृष्ण औंसी लक्ष्मीपूजा	१७
३४.	यःमरि पुन्हि कूपूजा	१९
३५.	भीगु संस्कार, संस्कृति दुने वसुन्धरा	२०
३६.	सम्यक्पूजास वसुन्धराया स्थान	२१
३७.	वसुन्धरा प्रदक्षिणा व पूजा	२१
३८.	वसुन्धरा प्रदर्शनी	२२
३९.	वसुन्धराप्रति लोक आस्था	२३
४०.	वसुन्धराया आवश्यकता	२३
४१.	वसुन्धरा सेवा भक्तिया पूण्य प्रशंसा	२४
४२.	वसुन्धरा व्रतविधिस तःसिया महत्व	२४
४३.	जलगालय् जम्बलजलेन्द्र	२६
४४.	वसुन्धराप्रति आधुनिक सेवा	२६
४५.	वसुन्धराव्रत गातिला धलं दनेगुया तजिलजिया ज्याइवः	२९

४६.	वसुन्धरा धलं दने न्ह्यरुखुन्हु पूर्वसेवा मण्डलाधिवासनया क्रियाकर्म धूसः यायेगु	३०
४७.	वसुन्धरा गातिला धलं दनेगुया त्रिधिविधान क्रिया	३२
४८.	गातिला धलं सति खुन्हुया विधि	३९
४९.	वसुन्धरा स्तोत्र	४१
५०.	वसुन्धरा ध्यान	४१
५१.	वसुन्धरा धारणी	४१
५२.	तिब्बती परम्परागत बौद्ध धर्म “सुङ धुङ” नामक धारणी संग्रह ग्रन्थस उल्लिखित आर्यश्री वसुन्धरा देवीया धारणी	४२
५३.	वसुन्धरा चर्या गीत	४२
५४.	वंभव वसुन्धरा चर्यागीत	४३
५५.	धनकरी वसुन्धरा चर्यागीत	४४
५६.	वसुन्धरा स्तोत्र (नेपालभाषं)	४४
५७.	वसुन्धराया स्तुति (नेपालभाषं— स्वामी प्रभुया लय्)	४४
५८.	वसुन्धराया बाखं म्ये (नेपालभाषं)	४६
५९.	वसुन्धरा देवीया दाफा म्ये	५४
६०.	गातिला गुथिया छगू तालपत्र अभिलेख	५५
६१.	वसुन्धरा देवीया १०८ ता नां	५६
६२.	यलदेया वसुन्धरा पूजाया धलः	५९
६३.	वसुन्धरा सम्बन्धी सन्दर्भ श्रोत— प्राचीन साहित्य	६०





दकले पुलांगु इदे वसुन्धराया प्रस्तर मूर्ति

श्री वसुन्धरादेवीयात् नमस्कार ।

वसुन्धरां सदा नत्वा दारिद्रार्णवतारणीं
दिव्यरूपीं सुरूपीं च सौम्यरूपीं वरप्रदां ।

श्रीवसुन्धरादेवी उत्पत्तिया न्याखँ

श्रीस्वयम्भूज्योतिरूप पंचबुद्धात्मक धर्मधातु वागीश्वर प्रादुर्भाव
जुयाच्चंगु नेपाल मण्डलस शान्तिनायक भगवान् बुद्ध जन्म जूगु, जम्बुद्वीपे
अतिकं प्रसिद्धगु, थुगु पुण्यभूमि मञ्जुश्रीकृतरम्यभूमि नामं प्रसिद्धगु,
गनकि अनेक देवीदेवतापि वास याना च्वंगु नेपाल मण्डल जुल । थ्वहे
नेपालमण्डलया अतिकं पवित्र, सुन्दर, शान्तगु लुम्बिनी वनस अचिन्त्य
प्राणीपिगु हित, सुख-शान्ति निमित्त जन्म जुया बिज्याम्ह वसपोल शाक्य-
मुनि बुद्धं क्रमशः बुद्धचरित्र क्यना अनेक प्रकारं धर्मचक्रप्रवर्तन याना
बिज्यात । उगु धर्मचक्रप्रवर्तन सूत्रत मध्ये छगू विशेष महत्त्वपूर्णगु
“आर्यवसुन्धराकल्पसूत्र” खः । प्रस्तुत सद्धर्मग्रन्थया आरम्भस थथे
उल्लेख याना तइतःगु दु-

कौशाम्बिमहानगरे कण्ठकसंज्ञके
महावनवरे घोषितारामे सकल-
दारिद्रदुःखार्णवपरिशोधनाय
धर्मपर्यायं देशयन्तिस्मः. . . .

छगू इले कौशाम्बिमहानगरया कण्ठक नां जुयाच्चंगु तःधंगु वनखण्डया
सुन्दर उपवन घोषिताराम धैगु वगैचास बिज्यानालि महा अनुकम्पा
तया सुचन्द्रगृहपति नाम महाजनयात सम्पूर्ण प्रकारया दरिद्ररूपि

दुःखसागरं पार जुईगु उपाय स्वरूप धर्मोपदेश याना प्रसन्न जुयाविज्यात । थूगू खँ जिनं न्हापा अतीतकल्पे वज्रधरसागरनिर्घोष नाम तथागतयाके गथे न्यना तयागु खः अथेहे जिनं थौं थूगु सभाषद्यात कनागु जुल । थ्वहे तथागतया महत्त्वपूर्णगु सद्धर्मउपदेअ न्यनालि सुचन्द्रनामगृहपति नं श्री आर्यवसुन्धरादेवीप्रति निश्चय श्रद्धाभक्ति तथा वसुन्धराया उपासना याना दारिद्र्यदुःख मोचनजुया उद्धार जुया वन । थूगूहे प्रकारं सूर्योदयरारा एव विमलावती व चूतदेवी, निम्बदेवी उपासिका आदि आपालं उद्धार जुयावंगु जूल ।

थ्वहे परम्परा व आदर्शयात श्रद्धानिश्चय तथा अद्यापि सम्पूर्ण महायान बौद्ध जगतं वसपोल श्रीवसुन्धरादेवीया साधना उपासना याना मण्डल दय्का, विधिवत् व्रत दना, प्रदक्षिणा याना, पूजा, पाठ, स्तोत्र, धारणी मन्त्र ब्वना, भजन कीर्तन आदि याना वईच्चन ।

थुंकियागु संस्मरण स्वरूप भीगु जन्मभूमिइ नेपाःमितय्मं नं वसपोल वसुन्धरादेवीप्रति आस्था प्रतिष्ठा तथा वईच्चंगु साक्षि स्वरूप प्रमाणकथं विभिन्न प्रकारया कीर्ति, थिति, रीति, गुथि एव प्राचीन ऐतिहासिक स्मारक पुरातात्विक स्थल यत्रतत्र विद्यमान जुयाच्चन । धार्मिक उदाहरणया लागि उगु विषय कया थन संक्षिप्त विवरण प्रस्तुत याना च्वना—

वसुन्धरातीर्थस्थान

श्रीस्वयम्भू ज्योतिरूप दर्शन निम्ति विज्यापि सप्त तथागतपिमध्ये स्वम्हम्ह विश्वभुतथागतं अधिष्ठान याना थूगू गुणागुलि तीर्थ वसपोल श्रीवसुन्धरादेवीया पादुकामूल ग्वालि उत्पन्न जूगु गोडावरी (गुनागुलि) तीर्थ खः धका प्रसिद्ध जुयाच्चन । थूगू गुणागुलि कुण्डया लंख प्रवाह जूगु नदीयात प्रभावती धाई । थ्वहे परम्परायात अनुस्मरण याना प्रत्येक धार्मिक कार्य पूजा संकल्प याईवले थौंतक नं श्रीवसुन्धरा-प्रभावोत्पन्नप्रभावतीनदीसंगमेधका थ्व वाक्य ब्वना वईच्चंगुलि प्रमाणित जू ।

वसुपुर

श्रीस्वयम्भूज्योतिरूपयात सुरक्षा व आदरसत्कार निमित्त महान् चैत्याकार रूपे परिणत याना प्रतिष्ठा याना विज्याम्ह नेपाःया दक्ले सकले न्हापांम्ह गुरु वज्रघरया अंश जुयाबिज्याम्ह वसपोल गुरुवर सिद्ध आचार्य श्रीशान्तिकरजुं प्रतिष्ठा याना थकूगु पंचपुर मध्ये छगू थुगु वसुपुर नामं प्रसिद्ध जुया च्वंगु जुल । गुम्ह श्रद्धालु भक्तजनं थुगु थासय् पुरश्चरण आदि च्वन घाःसा निश्चय न उम्ह भक्त श्रीसमृद्धि-शालीम्ह जुईधका स्वयम्भू पुराणस उल्लेख यानातल ।

घनद्वँचीबाहाः

थूगु घनद्वँचीबाहाः सम्राट् अशोकया म्हाय् मय्जु चारुमती दय्का थकूगु चाय्वही लिकसं च्वंगु विशालरूप चैत्य खः । थूगु चैत्यया विषयय् वंशावलीया धापुकथं धर्मदत्त राजां आपालं घनधान्य बहुमूल्य रत्न गर्भे तया दय्का तःगु ज्यानिमित्त थुगु चैत्यया घनद्वँचीबाहाः नामं प्रसिद्ध जूगु जुल । खजा थगू चैत्यस स्थापित बुद्धमूर्ति स्वयानं थूगु चैत्यया पश्चिमाभिमुख वेदिकास अंकित वसुन्धराया शुभप्रतीक भद्रघट पूर्णकलशयात प्रधानता विया तल । थुकिं स्पष्ट जू थुगु घनद्वँचीबाहाः श्री वसुन्धरादेवीया आदर्श प्रतिनिधित्व याना च्वंगु खनेदु । थुगु कलश लिच्छविकालीन जुजु वृषदेवया शासनकाले निर्माण जूगु धैगु खं इतिहासकारतय्गु धापु दु ।

वसुन्धराद्वँ

थूगु थाय् खः गुरु मंजुश्रीनं स्थापना याना थकूम्ह जुजु धर्माकरया राजधानीपत्तन लाजिम्पाटया सन्निवर्ति उत्तरपाखे च्वंगु छगू पुलांगु भग्नावशेष ढिस्को दु । गुगु ढिस्को द्वँम्बःयात हे वर्तमान 'वसुन्धराद्वँ' नामं प्रसिद्ध जुयाच्वंगु जुल । थूगु थाय् सायद जुजु धर्माकरं राज्य शासन व्यवस्था याय्त प्रतिष्ठा याना थकूम्ह वसुन्धरादेवीयागु प्रासादया भग्नावशेष जुईफु । कालान्तरलिपा उगु पवित्र ऐतिहासिक स्थल

प्राकृतिक तथा मानवीय प्रकोपं विनाश जुल जुइफु । थौं उगु संस्मरण स्वरूप थुगु थाय् वसुन्धराद्वं नामं प्रसिद्ध जुया च्वन ।

तिष्ठुङ्गया कलशाङ्कित अभिलेख

थुगु अभिलेखया स्थान खः मन्त्रयानया गुरु आचार्य पद्मसंभव तपस्या याना विज्यागु पवित्र ऐतिहासिक स्थान तमनाऋषीश्वरया सन्निवर्ति तिष्ठुङ्ग भत्तुवाल धैगु बूया दद्यागिमे च्वंगु, जुजु अंशुवर्मा भन्सारकरया विषय कया उल्लेख यानातःगु छगू महत्वपूर्ण शिलालेख खः । भी धार्मिक, सांस्कृतिक परम्पराकथं थये प्रचलन जुयाच्च्वंगु खनेदु कि— चैत्यसम्बन्धी शिलालेख तल धाःसा उगु अभिलेखया शिरोभागस चैत्ययात अंकित याई । अथे हे बुद्धधर्म सम्बन्धी जुल धाःसा शिलांकू अंकित याई । गुह्यदेवीदेवतापिगु जुल धाःसा अन वज्र कर्तृ पात्र अंकित जुई । करुणामय अवलोकितेश्वरया जूसा पलेस्वाँ अंकित याई । भगवतीयागु जुल धाःसा खड्ग, गणेशोयागु जूसा लै, भिमसेनया जूसा गडा, हनुमानया जूसा मुगःया चिन्ह अंकित याइगु गुगु परम्परा खः उगु हे किसिमं वसुन्धराया जुलधाःसा कलश, भद्रघट एवं पूर्णकलश, स्थापना याई । थ्वहे परम्परायागु आदर्शयात अनुस्मरण याना उगु तिष्ठुङ्गया शिलालेखस कलश स्थापना याना तःगु जुल ।

ईदेया वसुन्धरामूर्ति

थुगु सुन्दर कलात्मक भव्य मूर्तिया नं थःगु हे विशेषता व महत्त्वपूर्ण दु । थुगु वसुन्धरामूर्ति उत्तरलिच्छविकालया अन्तिम समयपाखे निर्माण जूगु आभास खने दु । वसपोल धन, धान्य, रत्नया अधिष्ठातृदेवी वसुन्धराया प्रभावं थन शस्यसम्पत्ति चतुषष्ठी बृही, अन्नवस्तु प्रशस्त मात्रां उब्जनी जुइगु थाय् जुया हे थुगु थाय्यात प्राचीनकाले अन्नपूर्ण देश बूंदे धाइगु, कालान्तरे बूंदेया अपभ्रंस जुया वोदे धाय्गु चलन जुल । अज्ज स्थानीय शिलापत्रस ईदे मधासे ईर्यदेश धका स्पष्ट नकसां धयातःगु खनेदु । अज्ज ईर्यदेशयानं आर्यदेश धयातःगु नं जुइफु । थ्व अभिलेख जुजु रणजित मल्ल समययागु खः ।

ववहितिया प्राचीन कलश

ववहितिया लिकसं छगू प्राचीन ऐतिहासिक शिलास्तम्भ दु । थुगू शिलास्तम्भ लिकसं वसुन्धरादेवीया संस्मरणकथं शुभ प्रतीक रूपे थःगुहे किसिमं छगू शिलाखण्डसं सुन्दर कलात्मक कलश अंकित याना तईतल । थुगू कलश नं अन्तिम लिच्छविकालसं निर्मित जूगु खनेदु ।

तुकँबाहा चैत्यया प्राचीन कलश

तुकँबाहासं प्रस्थापित विशालरूप चैत्यया पश्चिमाभिमुख वेदिकासं छगू कलात्मक सुन्दर कलश अंकित याना तइतःगु दु । थ्व नं छगू प्रकारया वसुन्धरादेवीया शुभप्रतीकया रूपे स्थापना जूगु खनेदु ।

श्रीघः, न्हूघः, नघः

स्वंगु प्रकारया घःया थःथगु विशेषता व महत्त्व दु । थुकीयागु पृष्ठभूमि अध्ययन अनुसन्धान याना स्वल घाःसानं वसुन्धरादेवीं धारण यानाच्चंगु भद्रघट पूर्णघट पूर्णकलशलिसे निश्चय नं सामञ्जस्यता खने दय्फु ।

असँया अन्नपूर्णदेवी

असँत्वाया प्रसिद्ध अन्नपूर्णदेवीया गुगु कलात्मक भव्य मन्दिरया केन्द्रवर्ति स्थानसं प्रमुख देवताया रूपे अन्नपूर्णदेवीयागु मूर्ति प्रस्थापन मयासे रौप्यमय पूर्णकलशयात प्रतिष्ठा याना तःगु जुल । घयातःगु दु थ्व अन्नपूर्णदेवी वसुन्धराया प्रभावं येँ देशयात गथे यलदेशयात शिल्प-कला उद्योगप्रधान दे धाई, ख्वप देशात कृषिप्रधान घयातल अथेहे येँ देश नं व्यापारप्रधान जुयाच्चंगु जुल । थ्वहे कारणं व्यापारया केन्द्रवर्ति स्थान जुगुलिं थन स्वनिगल मध्ये समृद्धि धनरत्न प्रशस्त जूगु धाई ।

जलकुम्भदेवी

स्वनिगले गुलिनं देवीदेवताया मन्दिर निर्माण जुल, प्रस्थापन

जुल । उगु सम्पूर्ण देगः देगले स्ववन घाःसा छगू नं छगू मूर्ति विद्यमान जुयाच्चनी । तर थुगु जलकुम्भ चायागु गोम्पचास लः तथा हलसिद्धि त्रिशक्तिदेवी धका पूजा सत्कार याना वईच्चंगु ज्वलन्त प्रमाण भोगु न्ह्योने दु । थुगु प्रथा अन्यत्र दुर्लभ घासां छुं मपाः । जित लगेजूकि- त्रिशक्तिदेवी, त्रिमूर्ति, वसुन्धरा, महालक्ष्मी, कौमारीया एकीकृत रूपे प्रतिनिधित्व याना वईच्चंगु जुइफु । कारण हलसिद्धिया गन्तव्य स्थान गन गुगुं थासं वल धका माला स्वत घाःसा स्थानीय बुढापाकुतय्सं धयाच्चनी हलसिद्धिदेवी फूचोमाजु खः । फूचोमाजु धैम्ह हे जम्बल जलेन्द्रया अधिष्ठातृदेवी खः । अकि थौतक भोगु परम्पराकथ सुं श्रद्धालु दातापिसं जलाश्रय तुं, पुखु, हिती, निर्माण याय्त जलाधिपति गुणागुलि फूचोमाजुयात विधिविधानकथं पूजा याना लः फत्रं वनेगु चलन दनी । वस् थ्वहे परम्पराकथं जलदेशे जलद्योया रूपे स्वंपचास लंख जाय्क तथा उकीयात हलसिद्धि स्वरूपं जलघटयात पूजा सत्कार याना वईच्चन । अकि थन मूर्तिया स्थापना यायेगु आवश्यकता मदु ।

ये न्हसडकया कलश

थुगु थाय् खः ये न्हसडक वर्तमान न्यूरोडस च्वंगु विशाल बजार प्रवेशद्वारया लिकसं छगः भगवतीमन्दिर दु । थ्वहे भगवती मन्दिरया लिकसं न्येप्यहः पलेहः सहितगु छगू सुन्दर कलात्मक त्वहंया भव्य मण्डल स्थापना यानातःगु दु । थ्वहे मण्डलया दथुस पूर्णकलश अकित याना तईतल । उगु पलेहः पतिकं छम्ह छम्ह देवीया मूर्ति अकित याना शोभावृद्धि याना तईतल । सायद् थुगु विभिन्न मूर्ति वसुन्धरादेवीया गणचक्र जुइफु । थुगु कलशमण्डल थःगुहे विशेषता व महत्वपूर्ण जू ।

झोगु राष्ट्रिय मुद्राय् कलशया स्थान

भोगु सांस्कृतिक परम्पराकथं बिचाः याय्वले वसपोल वसुन्धरा- देवीया महत्त्व गौरव केवल धार्मिक, सांस्कृतिक, सामाजिक क्षेत्रय् जक सीमित मजुसे परन्तु आर्थिक क्षेत्रय् नं उत्तिकं सम्मानपूर्वक आस्था

प्रतिष्ठा तयावईच्वंगु खनेदु । घाय्कि उदाहरणया लागि- भीगु राष्ट्रिय मुद्रायागु इतिहास अध्ययन अनुसन्धान याना स्वयायंकल धाःसा थ्व खँ स्पष्ट जूकि- लिच्छविकालीन वैश्रवणमुद्रास रत्नमञ्जरी व कलशधारी देवीयात वसुन्धरा प्रतीकरूपे अंकित याना तल । अथेहे गुणाङ्कमुद्राय् व जयदेवया पशुपतिमुद्राय् न मूर्ति अंकित मयासे पूर्णकलश, पूर्णकुम्भ भद्रघट आदियात स्थान बिया, वसुन्धराया आदर्शयात सम्मान याना तःगु खनेदु । थथेहे मल्लकाले वयानं श्रीनिवास, जितामित्र, भूपतीन्द्र, रणजित् एवं पार्थिवेन्द्रया मुद्राय् तकनं कलश अंकित याना वईच्वंगु खनेदु । अज्ज शाहकाले वयालि राष्ट्रमिता श्री ५ त्रिभुवन सरकारं तकनं सिलभरयागु न्यागःवंगु ध्याये वसुन्धराया शुभप्रतीककथं कलश अंकित याना व्यूगु जुल ।

राष्ट्रिय अभिलेखालयया छगु ग्रन्थपुष्पिका

जुजु रत्नमल्लया पर्यायस काष्ठमण्डप यन्त्रलाछे भ्वन्तविहारया दानपति भिक्षु अमृतपालजु फल्गुसेनं लिहाँवयालि सद्धर्मचित्त उत्पत्ति याना दिवंगत थव पूर्वज गुरु आचार्य माँ वौपिगु नामं अनुत्तरबोधि प्राप्ति कामना यासँ दच्छियक वसुन्धराया तिलाव्रत धलदंकालि सांगि-जूगु शुभउपलक्ष्यस सुवर्णया श्रीवसुन्धरादेवीया मूर्ति, वसुन्धराया मण्डल, वसुन्धरा धारणी श्रीजम्बल हृदय नां जुयाच्वंगु सुवर्णाक्षर पुस्तक समेत दय्का व श्रीवसुन्धराव्रत धलंगुथिस द्रहलपा व्यूगु खँ न्ह्यथना तल । थ्व पुण्यकार्य ने. सं. ५२४ माघ कृष्ण चतुर्थी वृहस्पति-वारया दिनस जूगु जुल ।

खवप लाय्कूया छगू शिलालेख

स्वनिगःया मल्ल जुजुपिगु वंश परम्परा इतिहास वंशावली अभिलेख अध्ययन अनुसन्धान याय्वले थ्व खँ स्पष्ट जूकि- गुम्ह जुजुया थः इष्ट देवता खः, उम्ह देवीदेवताया नां शिलालेखया मङ्गलाचरणस थः थः इष्टदेवताया नां अंकित याय्गु परम्परा खनेदु । गथे श्रीमन्माने-

श्वरीष्टदेवता वरलब्धप्रसादात् घका उल्लेखयासें विभिन्न इले विभिन्न राजामहाराजापिसं थः थः परम इष्टदेवताया नां न्ह्यःथनेगु चलन दु । घाय्कि गुलिसिनं मानेश्वरीष्टदेवता, गुलिसिनं स्वेष्टदेवता, गुलिसिनं परमेश्वरीष्टदेवता घका सम्मानपूर्वक काली, भवानी, दुर्गा, तलेजुमाजु, करुणामय, लोकनाथ, हरिसिद्धि, गुह्येश्वरी, गोरखनाथ, पशुपतिनाथ आदि नांमं थः थःगु मुद्रास अंकित याना वइच्चन । थ्वहे इवल्य जुजु यक्षमल्लजुं भक्तपुर नगरयात सिमाबन्धनया रूपे गढप्राकारया निर्माण जूगु छगः महत्त्वपूर्ण शिलापत्रस वसपोल वसुन्धराया नाम अंकित याना व्यूगु जुल । थुगु शिलापत्र थौतकनं खप लाय्कूया लुं ध्वाकाया लिक्कं तयातःगु दु ।

चित्रसंग्रहालयया वसुन्धरा पौवाहाः

काष्ठमण्डप भोलडाछाँ निवासि दानपति शक्तिराज भार्या लुंगुदि-लक्ष्मी काय रामसिंह रक्षसिंह प्रभृति सकलया पुण्यचित उत्पत्ति जुया थव दिवंगत पूर्वजपिगु लुमन्तिस अनुत्तरबोधि कामनायासें भाद्रकृष्ण तृतीयाया दिनस भगवान् श्रीवज्रधर तथागत, भगवती श्रीवसुन्धरा देवीया सुवर्णलेपित पौवाहाः थव अबुमांमया नामं दय्कूगु जुल । थुगु पौवाहाः ने. सं. ६३३ सालं निर्माण जूगु खः ।

बूबाहाया छगु शिलापत्र

जुजु योगनरेन्द्रमल्ल विज्याका प्रतिष्ठा जूगु मञ्जुश्रीया ल्वहं देगःया संसःल्वहंतय् मञ्जुश्री व लोकेश्वर एवं वसुन्धरा स्थापना याना घका उल्लेख याना तल । तर वसुन्धराया थासय् मूर्ति मतसे केवल वसुन्धराया संस्मरणकयं पूर्णकलश जक अंकित याना तईतल । थुगु अभिलेखं बांलाक हे स्पष्टरूपं वसुन्धराया शुभप्रतीक धैगुहे पूर्णकलश खः घका प्रमाणित याना व्यूगु दु ।

मंगःलाय्कूया अन्नपूणदेवी

यल मंगःलाय्कूया हिति च्वसं भूकम्पपीडितोद्धार सम्बन्धी वर्णन उल्लेख जुयाच्चंगु शिलास्तम्भया शिरोभागस अन्नपूणदेवीया अन्तिम शाह कालयागु छगू शिलामूर्ति तयातःगु दु । थुगु मूर्ति नं वसुन्धरा-देवीया षोडशउपचारिका मध्ये छगू मूर्ति खः ।

यतंमातंया छगू भित्तीचित्र

यतंमातं धैगु यल क्वावाहाःया उत्तरलङ्काखे च्वंगु सलंसाया च्वसं च्वंगु वर्तमान धर्मागार गुम्बा खः । थ्व हे गुम्बाया छ्वाख्यलं च्वंगु भित्तीचित्र अंगले च्वयातःगु विविध किसिमया बौद्ध चित्रत खः । थुगु भित्तीचित्रस पंचत्रिंश तथागत, अष्टबोधिसत्व, सहस्रभुजलोकेश्वर, भैषज्यतथागत, अपरिमितातथागत, गुरुवज्रसत्व एवं जेचुमिला, भव-चक्रमण्डल आदि धर्मपालपिगु चित्रत अकित जुयाच्चंगु दु । थ्वहे गुम्बास प्रवेश जुईगु लुखाया फुसे च्वइतःगु घनधान्य ऐश्वर्यया देवी वसुन्धरायागु सुन्दरमूर्ति खः । थुगु किसिमं बौद्ध विहारया लुखाफुसे वसुन्धराचित्र च्वयातःगु अन्यत्र दुर्लभ धाःसां छुं मपाः । थ्व चित्र थःगुहे विशेषता खः ।

युगभेद वसुन्धराया स्वरूप

वसुन्धरा सम्बन्धी विविधपक्ष अध्ययन अनुसन्धान याय्वले गनं गनं वसुन्धरा छगू रूप जक मजुसे स्वंगू रूप, प्यंगू रूप दु धकानं वर्णन याना वईच्चन । स्वंगू रूप धाय्वले वसुन्धरा, महालक्ष्मी कौमारी धका मानेयाना तईतल धाःसा प्यंगू रूप धाय्वले गथेकि श्रीस्वयम्भूमहाचैत्य विराजमान जुयाच्चंगु सिगुपर्वतयात सत्ययुगे पद्मगिरी, त्रेतायुगे वज्रकूट पर्वत, द्वापरयुगे गोशृङ्गपर्वत कलियुगे गोपुच्छगिरी साम्हेंगु पर्वतनामं प्रसिद्ध जुयाच्चन अथेहे वसपोल भगवती श्रीआर्यवसुन्धरादेवीया स्वरूप नं युगभेदं फरक जूगु खनेदु । गथेकि—

- १) सत्ययुगस - वज्रवाराही
- २) त्रेतायुगस - वसुन्धरा

- ३) द्वापरयुगस - महालक्ष्मी
४) कलियुगस - वज्रकौमारी

वसुन्धराया प्यंगू स्थान

देवभूमि, पुण्यभूमि, तीर्थस्थल, तपोभूमि नामं प्रसिद्ध जुयाच्चंगु नेपालमण्डलस गन इलेखिले मुख्य मुख्यगु ऐतिहासिक पुरातात्विक प्राकृतिक सौन्दर्ययुक्त प्रसिद्ध प्रसिद्धगु देवस्थल, सीकःवनेगु दर्शन याःवनेगु थिथी परम्परा दु । गथे उदाहरण निम्ति थन निगू प्यंगू खं प्रस्तुत यानाच्चना-

प्यम्ह भगवान्

- | | |
|-------------|-------------|
| १) स्वयम्भू | २) नमोबुद्ध |
| ३) खास्ति | ४) वदेगाँ |

प्यम्ह जोगिनी

- | | |
|---------------|----------------|
| १) सक्व | २) फम्पि |
| ३) विजयेश्वरी | ४) गुह्येश्वरी |

प्यम्ह करुणामय

- | | |
|----------|---------|
| १) चोभार | २) नाला |
| ३) बुङ्ग | ४) जमल |

प्यम्ह सरस्वती

- | | |
|-------------------|----------------------|
| १) ईदेससुमाजु | २) वःखुससुमाजु |
| २) साख्वनाससुमाजु | ४) ल्हासापाकुससुमाजु |

प्यम्ह वाराही

- | | |
|----------------|---------------|
| १) वज्रवाराही | २) नीलवाराही |
| ३) श्वेतवाराही | ४) धतिलवाराही |

प्यम्ह गणेश

- | | |
|---------------|-----------------|
| १) जलविनायक | २) सूर्यविनायक |
| ३) अशोकविनायक | ४) चन्द्रविनायक |

प्यंगु न्हसिकाप

- | | |
|-----------|-------------|
| १) गोकर्ण | २) आर्यघाट |
| ३) चोभार | ४) क्वदुवाल |

प्यंगु गुफा

- | | |
|--------------|---------------|
| १) शान्तिपुर | २) नागार्जुन |
| ३) चोभार | ४) ल्हासापाकु |

प्यम्ह नारायण

- | | |
|-------------|---------------|
| १) सक्वचंगु | २) इचंगु |
| ३) विचंगु | ४) शिखरनारायण |

प्यम्ह मलः

- | | |
|---------|-----------|
| १) थछे | २) फम्पि |
| ३) पचलि | ४) पुंचलि |

प्यंगु द्व

- | | |
|---------------------|---------------------------|
| १) पश्चिमया किद्व | २) दक्षिणया जाकिद्व वाद्व |
| ३) पूर्वया गुद्वद्व | ४) उत्तरया धनद्व |

थुगुरुपं प्यम्ह वसुन्धराया स्थान

- | | |
|-------------|--------------------------|
| १) पूर्वया | — ईदेशया वसुन्धरा |
| २) दक्षिणया | — गुणागुलि फूचोमाजु |
| ३) पश्चिमया | — सिंगुया वसुपुर |
| ४) उत्तरया | — महाराजगञ्ज वसुन्धराद्व |

बुद्धप्रति वसुन्धरा साक्षि

बोधिसत्त्व सर्वार्थसिद्ध राजकुमारं सर्वज्ञत्व लाभ यांना सम्यक्-संबुद्धत्व प्राप्त जुल धंगु समाचार न्यना मारश्रेष्ठ तमुचि कृष्णवन्धु वया शाक्यमूनि बुद्धयाके प्रश्न यावःगु जुल । उगु समय ध्व खँ प्रश्न यात कि— छलपोल तथागत असंख्य स्वंगू कल्प पारमिता पूर्ण यांना सम्यक्-संबुद्ध जुल धाल, उकिया प्रमाण दृष्टसाक्षि सु दुले ? धका न्यंवेले बुद्ध

सहर्षसाथ थ्व खँ लिसः बिया बिज्यात हे मार पापिश्रेष्ठ कृष्णवन्धु नमुचि ! गुख्न्हु जि बोधिचित्त उत्पत्ति याना तथागत दीपंकरया आशिर्वाद व्याकरण जित प्राप्त जुल उगु इलंनिसें थौंतकया दुने असंख्य स्वंगू कल्प वंगु जुल । थुगु महान् अपरिमित पुण्यकार्य आर्जन निम्ति दानशील आदि दशपारमिता चलेयाना वयागुया दृष्टसाक्षि थन मेपि सुं मदु । केवल वसुन्धरा पृथ्वीमाता छम्ह हे जक दु धका बुद्ध तीजक जःगु ल्हा पिकया भूमि स्पर्श याना क्यना बिज्यागु जुल । उगु शुभमूर्त पृथ्वी तःज्याना उगु थासं तुरुन्त दृष्टसाक्षि रूपय् वसपोल वसुन्धरा सुप्रशन्न जुया न्ववाना बिज्यात धैगु खँ बौद्धग्रन्थय् उल्लेख जुयाच्वंगु दु । थ्वहे घटनायात आधार कया कुशल कलाकारं निर्माण याना तइ-तःगु छगू पुलांगु मूर्ति स्वयम्भूया चाकले प्रतिष्ठा याना तइतःगु दु ।

स्फटिकया कलश पूजा गुथि

लिच्छवि जुजु नरेन्द्रदेवया पर्यायस स्वनिगले भिनिदँतक अनावृष्टि जुया दुर्भिक्ष जूल, हाहाकार जूल । उगु दोष निवारणया निम्ति सहकाल यायेत गुरु वन्धुदत्त, जुजु नरेन्द्रदेव, रथञ्चक्र भरिया ललित-ज्यापु व कर्कोटक नागराजपिंगु समष्टिगत अथक प्रयासं यक्षराक्षसपिंगु देश अतिदुर्गम कामरुकामाक्ष देशे वना वृष्टिदेव श्रीमान् आर्यवलोकितेश्वर करुणामय बृंगमलोकेश्वर नेपाले बिज्याका सहकाल सुभिक्ष याना बिल धैगु खँ भीसँ न्यना वइच्चनागु खः । थ्वहे महत्त्वपूर्ण इतिहासया आधारकथं स्थापना जूगु यल लगंख्ययाःया प्रसिद्ध ऐतिहासिक स्थान बृंगद्यःया मां द्वलंमाजु खः । थ्वहे द्वलंमाजु (वसुन्धरा)यात दँय् छक अनन्त उपकारी थव जन्मदातृ मांयात त्रिप्रदक्षिणाया रूपय् स्वकः तक बृंगद्यःया रथ चाहुइकेगु परम्परा अद्यापि कायम जुया च्वन ।

आ थन खँ वई द्वलंमाजु छाय् वसुन्धरा जुल धैगु ! थुथास थ्व खँ स्पष्ट याय् माःगु दु कि- वसपोल करुणामय बृंगद्यः यक्षयक्षिनीया कुले छाय् जन्म कावन । उपि यक्षयक्षिनीया प्रमुख ज्या च्वम्ह जम्बलजलेन्द्र यक्ष खः । थ्वहे जम्बलजलेन्द्र धैम्ह हे खास वसुन्धरादेवीया मुख्य मन्त्री

वया तल । थुपि द्वल्लिम्ह यक्षयक्षिनीया मां हे बृंगद्यःया मां खः धैगु प्रमाण विभिन्न थितिरिति भीगु संस्कार संस्कृति धयाच्चंगु दु । अकि भीसं द्वलंमाजुयात शुद्ध वाक्यं पुलांगु अभिलेखस “द्वलन्या माजु” धका नामकरण याना वइच्चन । थुक्रिया । अर्थ खः द्वल्लि न्याया मां अर्थात् सहस्रमत्स्यमीनया मालिक जुयाच्चंम्ह जुयाहे भीसं थौतक नं बृंगद्यःयात “श्रीमत्स्येन्द्रनाथ” धका धया वयाच्चनागु जुल । मत्स्य धैपि जलविना जीवित जुइफैमखु अकि थुमिगु प्राणधार हे जल खः । थ्वहे जलया इन्द्र जम्बलजलेन्द्र खः । थ्व हे जम्बलजलेन्द्रयानं मुख्य अधिष्ठातृदेवी वस-पोल श्री वसुन्धरादेवी जूगु जुल । धार्थे हे धाय्गु खःसा थुक्रियागु परम्परा इतिहास अनुश्रुति मालावं यंकेवले जलसागरया अधिष्ठातृदेवी वसुन्धरा खः धैगु निर्विवाद सिद्ध जुई ।

थ्वहे परम्परायात कायम याना द्वलंमाजु सिद्ध जूगु ऐतिहासिक स्थान द्वलंमाजुयात भीसं बृंगद्यःया मां धका श्रद्धा आस्था तया वई-च्चनागु जुल । थ्वहे थासे मेमेगु देवीदेवताया मूर्ति मतसे वसुन्धराया प्रतीक स्वरूप स्फटिक कलश तया थुगु थासय् पूजा आज्ञा याना वई-च्चगु खनेदु । थुगु स्फटिक कलश दच्छि छक थुगु हे थासे तया पूजा याना गुथि हनाच्चन । थुगु ऐतिहासिक स्फटिक कलशयागु स्वामित्व गुरु बन्धुदत्त आचार्यजुया सन्तानपिसं संरक्षकत्व प्रदान याना वईच्चंगु दनी । थुगु साधनयुक्त स्फटिक कलशया दुनेच्चंगु जल अद्यापि प्रत्यक्ष रूपं दर्शन याय्फुनि ।

थुगु थाय्था विषय कया बूढापाकुतय्गु धागु दुकि-वसपोल जम्बलजलेन्द्रदेवीया प्रभावं थुगुथासे लः प्रशस्त दयाच्चंगु धाई । उकि थुगु थाय्था लगभगः मखु लःख्यः धका प्रसिद्ध जुयाच्चन । थुगु लःख्यःया दथुस च्वंगु कवफो सिमाया कवसं च्वेगु द्यायात भाव भक्तियात धाःसा लुंफंसि वरदान बिइ धका धाई । थ्वहे थासं प्रवाह जूगु हःखुसि लुंफंसि चुयेके हःगु लानालि हौगःया सम्यक्छः स्थापना याना सम्यक्तक न्यायका वन धाई । थ्वहे थासं न्ह्याःगु पूर्वरूप छगू खुसिचायात अद्यापि सुवर्णनदी (लुंखुसिद्यः) नामं प्रसिद्ध जुयाच्चन ।

बुंगद्यःया रथजात्रास कलशयुक्तधकिं

श्वहे परम्परा व आदर्शयात सम्मान याना हे बुंगद्यःया रथजात्रा प्रस्थान यायेत रथ न्हाकेत न्हापालाक बुंगद्यःया न्ह्योनेसं वसपोलया स्वागत सत्कार निम्ति उगु साधनयुक्त कलशया प्रतिनिधि रूपे रौप्य-मय कलश अंकि धकिं न्ह्याःव्वया जक वन्देज पांजुपिनि ववसं सय् सय् बाज्यापि च्वना हःपा विईगु, विईकेगु प्रचलन जुया च्वन ।

वसुन्धरा जात्रा

वसपोल वसुन्धरादेवीयागु भावभक्ति पूजा आज्ञा स्तोत्र पाठ भजन जक याना वईच्वंगु मख्कि दयँदसँ तिलाव्रत न दना वइच्वन । लिसेलिसँ वसुन्धराया नामं थितिरीतिगुथि व नखःचखः नं मानेयाना वइच्वंगु खनेदु । अज्ज धार्थे हे धाय्माल धाःसा वसुन्धरादेवीयागु जात्रातक नं भव्यरूपं स्वागतसन्मान याना वइच्वंगु दु । श्व दिन खः गुवले इलन्हे सम्यक् जुई उख्न्हु उल्लासपूर्ण वाद्यवादनसहित ज्येष्ठवर्ण विहारनिमें वसुवर्धनविहारतक थ्यंका जात्रा विश्राम जुई । इलन्हे सम्यक्स गुलिनं सम्यक् देवता दीपंकर, बुद्धबोधिसत्त्व एवं आर्यातारापि उपस्थित जुइगु खः उगु इवलय् दकले सकले च्वय् तथा मर्यादाकथं स्वागत सत्कार याई । थगु थितिरीति वसपोल वसुन्धराया महिमा व गौरव प्रतिष्ठा गुलि दु धेगु स्पष्ट याः ।

वसुन्धराया नामं नखः चखः

थःगुहे विशेषता व महत्त्वं जाया च्वंगु नेपाल गौरव नेवाः संस्कृति दुने दुहाँवना स्वतधाःसा गुलिनं नेपाःया स्त्रीवर्ग रूपे परिणत जुया च्वंपि देवी, जोगिनी, तारा, भगवती, काली, दुर्गा, सरस्वती, लक्ष्मी मातृका गणपि दु अग्रिमगु इवलय् गुलि वसुन्धराया प्रसिद्धि व गौरव महत्त्व व्यापक रूप प्रचार प्रसार जुया च्वन उलि मेमेपि स्त्री वर्गया द्योपिके खनेमदु धाःसां अत्युक्ति जुईमखु ।

स्वयादिसँ भीगु मातृभूमि नेपाःदे बहुजाति, बहुभाषिक, बहुधर्म (सम्प्रदाय) बहुशासकपि सम्मिलित जया परस्परे सहिष्णुताभाव पिज्वया च्वंगु धर्मया नामे ल्वापुख्यापु मदुगु देश खः । थन बौद्ध, शैव, शाक्त, वैष्णव, सौर, गणपत्य, कापालिक, एवं नाथ सम्प्रदाय आदि दुसानं परम्परागत चलेजूया वईच्वंगु थितिरीति, मस्कार संस्कृतिस थःथःगु धर्मदर्शन अनुसार दृष्टिकोण भिन्न भिन्न जुया च्वंगु खनेदु । थ्वहे सन्दर्भे बौद्ध दृष्टिकथं वसुन्धराया चाडपर्व नखः चखःलय गुलि गथे सामञ्जस्यता खनेदु धैंगु विषय कया थन प्रस्तुत याना च्वना-

ज्येष्ठ शुक्ल षष्ठी

सिनखः खुन्हु वसुन्धरा स्वरूपं पृथ्वीमाता पूजा यानालि पृथ्वी-यागु प्रसाद रूपे खुता प्रकारया बूबः माय्, कःसू, मू आदिया वो छुना नयेगु थ्व प्रचलन थौतक परम्परा न्ह्याना च्वन । थ्खुन्हु पृथ्वीयात भार जुईगु इयातुकुतु ज्या यायेगु व धाङ्धुङ्ग याना बजि ल्हुइगु कुटि चायेगु नं यायेमज्यू धका निषेध याना तःगु दु । खजा थ्खुन्हु हे जलाश्रय त्तुं, हिति, पुखु आदि नं सुघरसफा याय्गु ज्या जुया च्वनी ।

असारया सिनाज्या

माँ वसुन्धरादेवी बिज्याना च्वंगु तुषिताभुवनं वसुन्धरायागु भद्र-घट, जलघट भय्भय् बिया पृथ्वीस जलवृष्टि जूगु धका पुलां पि बुढा-पाकातय्सं घयाच्वनी । थ्व जलवृष्टिया वरदान खः, सय्सामा अन्नवस्तु प्रशस्त जुईगु धैंगु हे वसुन्धरायागु धान्यमञ्जरीयागु प्रसाद खः धका भाःपिया च्वनी । अकिं धान्यमञ्जरी तिलाव्रत वसुन्धराया व्रत दनेत अनिवार्य रूपं वागुइ द्रहलप्येगु चलन जुयाच्वन ।

पालिजा स्वांया महत्त्व

तुषिताभुवने बिज्याना च्वंम्ह श्री वसुन्धरादेवीयागु व्रत धर्मया महिमा प्रशंसा स्वर्गभुवने प्रचार प्रसार जूगुलि शुक्र देवराज ईन्द्रया थव

मामं श्री वसुन्धरा देवीया तिलाव्रत घले दनेगु तःधंगु मनसुवा याना विज्यात । उगु इलय् वसुन्धराव्रत घलं दनेत देवगुरु वृहस्पतियाके छु छु सामग्री आवश्यक जू घका प्रश्न याःगु अनुसारं व्याक्व सामग्री दयानं पालिजास्वां छता स्वर्ग भुवने दुर्लभ जुयाच्चंगु सियालि थव मांया महान् सदिच्छा पुरे यायेया लागि देवराज ईन्द्र थःहे मर्त्यमण्डले कुहाँ वयाः पालिजास्वां खुया काःवगु जुयाच्चन । उगु इलय् नेपाःया प्रसिद्ध तान्त्रिकविद् आचार्यपिसं पालिजास्वां खुवःम्ह ईन्द्रयात जम्भनस्तम्भन याना पेपुंक चिनाः तल । थथे स्वां खुया काःगुलि ईन्द्र हे जूसां थवयात सजायं बिइमाः घका पिखालखुई तथा चिनातःगुया संस्मरण कथं थौया अद्यापि यंमहाद्यो स्वायेगु चलन दनी । उगु इलय् स्वर्गभवने ईन्द्रया मांम्हं विचाः यातकि- ख ? मर्त्यलोके वना पालिजास्वां माः वंम्ह काय् भाजु आःतक मवनी घका अन्तरध्यानं स्ववले थः काय्यात स्वां खुं घका बन्धने तथातःगु सीका स्वयम् थःहे खसु व सितं भुंका अदृश्यरूपं ईन्द्रया मां वया उगु वन्धन मुक्त याना बिल धाई । थवहे परम्पराकथं अद्यापि यंज्यापुन्ही भाः यक्व दय्क खसु व सितं व्याप्त जुयाच्चनी । थव नं छगू प्रकारया प्राकृतिक साक्षि खः । थवहे परम्परायात लुमंका पंचशील विपरीत अदत्तादान कर्मया विपाकफलरूपे त्वाः वाहाले थाय् थासे ईन्द्रमहाद्यो जूसानं सास्ति विया तःगु धंग संस्मरणकथं यंमहाद्यो स्वायेगु थितिरीति गुथि आःतकं विद्यमान तिनी ।

भाद्रकृष्ण तृतीया गातिलां धलं

थव वसुन्धरा धलं गातिला धलंयागु महत्त्व व प्रसिद्धियात श्रद्धा-भक्ति तथा व्रत उपासना याना वंषिगु वर्णन बौद्ध वाङ्मय अवदान कथास उल्लिखित अनुसार विचाः यायेवले थुक्रियागु परम्परा यक्व यक्व प्राचीनता खनेदु । धाय्कि- अतीत कल्पे वज्रधरसागर निर्घोष राज तथागतया पर्यायिनिसं शुभारम्भ जूगु खं शाक्यसिंह तथागतं सुचन्द्र-गृहपतियात आज्ञा जुया विज्यागु दु । थुगु रूपं सूर्योदय राजा, चन्द्रोदय राजा, निम्बदेवी, चूतदेवी, सेनगुरु, अश्वघोष, नन्दीमुख, विमलावती

आदि आदिपिगु नां अग्रपंक्ति लानाचवंगु दु । थ्वहे उच्च आदर्श व परम्परायात कायम याना भी प्रातः स्मरणीय पूर्वाचार्यपिसं व विभिन्न श्रद्धालु भक्तजनपिसं वाहाः, वही, दिगि, धलंसाला, चपाः, सतः, चुक-
ननी, लिवि आदि थासे चवना वसुन्धराव्रत धलं दनीगु प्रथा कायम जुया चवंगु खनेदु ।

आश्विन शुक्ल सप्तमी कूछिभव्य

थलबल आपा पुलां जूलिसे थलबलया रूप विकृति जूथें शब्दत नं यक्व पुलां जूलिसे अपभ्रंस जूगु खनेदु । गथेकि पंचमूत्रकया पसूका व्रतसूत्रकाया वःका धाःथें थःगु परम्परागत वंशानुगत थःगु कूलमात्रया जहान परिवार सकलें छगू समूह जुया कुलछिसियां भव्य नयेगुयात थौं उगु शब्द विकृत जुया कूछि भव्य धका कूछि कूछि वजि दाना नयेमाःगु धैगु भावना जूल ।

थुकीया पाय्छि अर्थ खः भी जि कुल परिवार गृहस्थाश्रमे चवनी-
पिन्त परम आवश्यकगु अपरिहार्य वस्तु अन्न, धन, रत्न श्रीसंमृद्धिया अधिष्ठातृदेवी श्रीवसुन्धराया ध्यान, ज्ञान, चर्या साधनयात सुचारुरूपं न्हाकेत छु यासा जी गुगु यासा जी धैगु विषय कया सकल कुटुम्ब मूना विचार विमर्श याना निष्कर्षे थ्यंसेंलि उगु उपलक्ष्य लसता भव्य नयेगुयात कुलछि (कूछि) भव्य धयातःगु खः । अपराध कसूर छुं मडुपिं छुं मस्यूपिं अज्ञानी अनाथ प्राणीपिन्त घातक याना पशुबलि विया भव्य नयेगु थ्व कदापि कुलछि (कूछि) भव्य मखु, करुणाहीन धर्म-
विपरीतगु भव्य खः ।

कार्तिक कृष्णअसौ लक्ष्मीपूजा

बौद्ध दृष्टिकथं अन्न, धन रत्नया अधिष्ठातृ वसुन्धरा देवी खः ।
बौद्ध दृष्टिकथं अन्न, धन रत्नया अधिष्ठातृ देवी नारायणया शक्ति लक्ष्मी मखु । श्रीसंमृद्धि वरदान विईम्ह वसुन्धरादेवी खः धैगु स्पष्ट प्रमाण वसुन्धरादेवी ज्वना चवंगु ल्हाया ज्वसां न्ववाना चवंगु दु ।

उदाहरणया निर्मितं थ्व घया च्वनकि- सम्पूर्णं शस्यसम्पत्ति, चतुषष्ठी
 अन्नवस्तु सयसामया शुभप्रतीक अर्थे धान्यमञ्जरी, वागुई ज्वना च्वन,
 अर्थे वहूमूल्य अमूल्य हेरामोती ज्वहारात श्रीसम्पत्तिया शुभप्रतीकया
 अर्थे रत्नमञ्जरी ज्वना च्वन । अर्थेहे सकल मनीवाञ्छापूर्णं याईगु
 भद्रघट स्वरूपं पूर्णं कलश ज्वना च्वन । थ्वहे कलशयागु अभिषेक बिया
 आयु, पुण्य, ज्ञान, गुण, कर्म, सिद्धि, सौभाग्य परिपूर्णं याना बिया-
 च्वन । ध्यानीज्ञानी योगीतपस्वीया रूपे अक्षमाला ज्वना च्वन । एवंरूपं
 अज्ञान कर्मबलेश दुःख फुकीगु प्रज्ञाज्ञानया शुभप्रतीक रूपे प्रज्ञापारमिता
 पुस्तक ज्वना च्वन । तर लक्ष्मीदेवीयाके थुजा थुजागु गुण खनेमदु,
 भीसं खनाच्चना लक्ष्मीयाके केवल पलेस्वां व न्हेक सिन्हःमू जक ।
 लक्ष्मी धैम्हजा वसपोल वसुन्धरा देवीया भिखुम्ह उपचारिका मध्ये
 छम्ह उपचारिका सेविका जक खः । वसुन्धराया षोडश उपचारिकापिगु
 नां थथे खः-

- | | |
|------------------|-------------------|
| १) सर्वलक्ष्मी | २) विश्वलक्ष्मी |
| ३) भुवनलक्ष्मी | ४) राज्यलक्ष्मी |
| ५) मण्डललक्ष्मी | ६) गृहलक्ष्मी |
| ७) धनलक्ष्मी | ८) धान्यलक्ष्मी |
| ९) सन्तानलक्ष्मी | १०) जनलक्ष्मी |
| ११) खड्गलक्ष्मी | १२) बुद्धिलक्ष्मी |
| १३) दृतिलक्ष्मी | १४) ज्ञानलक्ष्मी |
| १५) मोक्षलक्ष्मी | १६) महालक्ष्मी |

थुगू भिखुगु कार्यभार अधिकार गुणनं वसपोल वसुन्धरायाके
 विद्यमान व सुसम्पन्न जुया च्वंगु दु । अकि बौद्ध परम्पराकथं ढुकूया
 मूल द्वारे लुखाया थखलुस आदरपूर्वक वसुन्धरा देवीया मूर्ति अकित
 याना वइच्वंगु खनेदु । उदाहरणया लागि थ्व धाय्फुकि जोथाबाहाःया
 दथु लुखाया थखलुस वसुन्धराया मूर्ति अकित याना तल । अर्थेहे भी
 सकसिनं म्हस्यूम्ह साहित्यकार सत्यमोहन जोशीजुया निवास स्थान
 बखुंबाहाःया प्रवेशद्वारस गुरू वज्रसत्त्व मूर्ति अकित याना तःगु दुसा

थुगु लुखायानं दुने च्वंगु लुखाफुसे वसुन्धराया हे मूर्ति अंकित याना तःगु जुल । थुगु मूर्ति नं गुगुइले बखुंवाहाः निर्माल जुल उगु ई यागु मूर्ति खः । थथेहे दथू तःइयाःया छम्ह समाजसेवी पासा खड्गलाल श्रेष्ठजुया धुकूया लुखाफुसे नं वसुन्धरा हे अंकित याना तईतल । थुगु कथं वसुन्धरायात बौद्ध शैव निखलसियां श्रीसम्पत्तिया प्रमुख देवता खः धेंगु भीगु संस्कृतिकथं प्रमाणित जूगु दु । तर धुकूया लुखाफुसे लक्ष्मीया मूर्ति अंकित जूगु खनेमदु ॥

यःमरिपुन्ही कूपूजा

यःमरिपुन्हीखुन्हु नेवाःतय्सं कू पूजा घका पूजा याइगु खासयाना थ्व नं छगू प्रकारया वसुन्धराया पूजा हे खः । धुकू धेंगु हे लक्ष्मी खः । लक्ष्मी धेंगु हे धुकू खः । अकि बुढा बुढीतय्सं आम्दानी खर्च मिले-मजुईक यथ्य हलंसितालं खर्च यातकि लक्ष्मीं सहयाये फुगुला ? घका भीत न्वाय् धुकि । थ्व धाःगुया तात्पर्य थ्व खः कि उगु थासय् लक्ष्मीं वास याये फैमखु घाई । थुगु दिनयात छाया “कू पूजा” धाःगु खः । थुकि छक नं बिचाः यथे वहःजू । साधारणकथं कू धेंगुया अर्थ धुकू खः । धात्थ्ये धायेगु खःसा अमरसिंह वन्देजुं दयेकूगु अमरकोशया धापु कथं पृथ्वीया नां वियातःगुलि छगू नां “कू” घका उल्लेख यानातल । थ्वहे कू हे भीगु धुकू खः । अज्ज बांलाक धायेगु जूसा उदारचरितानांतु वसुधैवकुटुम्बकं धयातःथें भी सकसियां साभागु मंकाशु व्यापकगु थलस न्होंगु धातुमूलजीवया अक्षय भण्डार, विशाल भण्डार थ्वहे वसुन्धरां धारण याना तःगु पृथ्वी हे खः । थ्वहे पृथ्वीया उपनाम खः “कू” । थ्वहे “कू पूजा” नामं भीसं हनावइच्चवनागु चाडपर्व नखः मार्गशुक्ल पुन्ही खः । थ्वहे पुन्हीयात यःमरिपुन्ही नं घाई । यःमरि पुन्हीया नामं यक्षयक्षनीया रूपे हासाज्बं कुलिज्बंया नापनापं यःमरि मायमरि मायो बायो व हिरामरि, लोंचामरि दयेका धुकूतिइ सोथना वसुन्धरा पूजायाना प्यन्हुतक गुप्त रूपं तयातई । थुगुकथं अद्यापि भीसं कूपूजाया नखः हनावया च्वना । थुखुन्हु बहनी कूपूजा याये सिधयेका

वसुन्धराया प्रसाद वितरणया रूप्य त्वाःवाहाःया मन्त्रमिसातयत्तः
 त्योछित्यो विद्गु नं चलन दु । कुमारीमस्तय्गु सुवा कायेत अथवा
 भितुना कायेगु धिति खः । कुमारी धैपिहे वसुन्धराया छगू अंश खः ।

झोगु संस्कार, संस्कृति दुने वसुन्धरा

थुगू किसिमं पुरातात्विक, ऐतिहासिक एवं चाडपर्व विषयकया
 गुर्गिलिनं वसुन्धराया चर्चा, परिचर्चा जुल । आः थन वयालि संस्कार,
 संस्कृति दुने गन गुगु प्रकारं वसुन्धरायात कया छु छु यात धंगु विषययात
 कया उदाहरण निर्मित निगू, प्यंगू खँ थन न्ह्यथना च्वना-

सुं गुम्ह श्रद्धालु भक्तजनपिसं तीर्थ, पर्वते, विहारे, श्मशाने, वना-
 न्तरे, चैत्य धर्म धातुं देवप्रासाद एवं मूर्ति प्रतिष्ठापन निर्मित भूमिद्विधाः
 कया पाद स्थापना यायेगु शिलान्यास यायेगु आवश्यक जुई, अतः उगु
 थासे वसुन्धराधिवासन क्रिया जुई ।

हानं शान्ति स्वस्ति कामनायासे गन गुबले यज्ञयज्ञादि, होम,
 सहस्राहूति, आयुताहूति, लक्ष्याहूति एवं कोट्याहूति आरम्भ यायेत वा
 कुलि वात्वा वाफं सोनेगु ज्या जुई, उबले अननं वसुन्धरा स्वरूपं पूजा
 जुई ।

सुयां गुम्हसियां आदित्य ग्रहादि दोष निवारण निर्मित शान्तिपाठ
 रूपे आर्यवसुन्धराकल्पसूत्र पाठ याका वसुन्धरायागु पूजा जुई ।

सुं उपासक उपासिकां कुलपुत्र कुलपुत्रीपिनि दारिद्र दुःख शान्ति
 निर्मित लक्ष्मी साधन याये मालावन धाःसानं कुशल आचार्यपिगु
 निर्देशनकथं पुरश्चरणादि च्वना धनधान्य ऐश्वर्यदेवी श्री वसुन्धरा
 आराधना याना साधन याईगु प्रचलन दु ।

प्रथम ज्याथजंकु भीमरथारोहण जुईवले नवग्रह मण्डल पूजा यात
 धाःसा निक्वगु महारथारोहण जुईवले वसुन्धरायागु मण्डलपूजा जुई ।
 अथेहे स्वववःगु ज्याःजंकु देवरथारोहण जुईवले आर्य उष्णीषविजययागु
 मण्डल पूजा जुईगु खः । थुगू रूपं धार्मिक कार्य सम्यक् नरां, पञ्जरां
 ओला, वाहाःपूजा, दीक्षाकर्म न्यायेकिवले तकनं दानपतिया छे चाचि

चवकिवले वसुन्धराया चित्र चवकिगु चलन नं मदुगु मखु । थुगु रूपं विवाह, व्रतवन्ध कर्म जूइवले नं मूलुखा प्रवेशद्वारया जःखः वसुन्धराया प्रतीक स्वरूपं भद्रघट, पूर्णघट चवका आगन्तुकपिन्त स्वागत सत्कारया सूचक रूपे थुगु किसिमं मंगलाचिह्नः चवकिगु, चवयेगु परम्परा दनी ।

न्हगु दँया न्हवर्षया सयसामा अन्नवस्तु सर्वप्रथम थःगुछे प्रवेश जूगु उपलक्ष्यस धान्यलक्ष्मी शुभागमन जूगु भाःपा धौवजि छाया दीप दान विइगु चलन दु ।

हानं सुं पृथकजन निम्नस्तर वर्गपिनि न्हिच्छि दुःख कष्ट सिया पारिश्रमिक स्वरूप ज्याला प्राप्त जूईवले अथवा आकस्मिक धनरत्न लाभ जुल धाःसा नं उगु पारिश्रमिक स्वरूप दानदक्षिणायात सहर्ष ल्हाती फयाः कयालि आदरपूर्वक धन्य वसुन्धरा धका भागी याना, अनियाना यथास्थाने तथा सुरक्षित यायेधुंकी ।

सम्यक्पूजास वसुन्धराया स्थान

स्वनिगःया नेवाःसमाजे गुलिनं धार्मिक, सांस्कृतिक सम्बन्धी थितिरिति गुथि दु । उगु सम्पूर्ण शुभकार्य मध्येस अतिकं च्वन्ह्यागु प्रसिद्धगु येँ, यल, ख्वपया प्राचीन नगर ललितपुरस जुइगु सम्यक् महोत्सव खः । उगु सम्यक् महोत्सवस सम्पूर्ण बौद्धविहारया सम्यद्यो कुर्यापांजु व छत्रकूजु आजुपि सहित सर्वसंघपि उपस्थिति याका देशया छत्रपति जुजु समेतं विज्याका विधिवत सम्यक्पूजा, सम्यक्दान जुइगु थुगु महान् धार्मिक कार्यया इवल्य वसपोल आर्यश्रीवसुन्धरा देवीयात सर्वोपरि स्थान प्रदान याना वइच्चन । थुजागु प्रकारया गौरवपूर्ण मर्यादित सुसम्मान अन्य देवी देवतापिन्त दुर्लभ धयां अत्युक्त जुइमखु । थ्व प्रथा वसुन्धराप्रति नेपाःया थःगुहे विशेषता व गौरवपूर्ण लोक आस्थाया ज्वलन्त प्रमाण खः । परम्परागत साक्षि खः ।

वसुन्धरा प्रदक्षिणा व पूजा

थुगु रूपं वसपोल वसुन्धरायागु महिमा अपार अनन्त खनी बैगु

श्रद्धाभावं अनुप्रेरित जुया दय्दसं यले गन गन वसुन्धराया मूर्ति प्रतिष्ठा
जुयाच्चन अन अन वना थः थः गु श्रद्धाभक्ति अनुसार पुष्प, धूप, दीप,
गन्ध, रस, नैवेद्य, मरिचरी, फलमूल एव छत्र, ध्वज, पताका आदि
सहित याना भक्तजनपिगु जुलुस प्रस्थान जुई । नाप नाप अनेक वाद्य-
वादन सहित मनोरञ्जनपूर्वक वसुन्धरा पूजा न्ह्याई । गुलि गुलि
श्रद्धालु दानपति कजीपिन्सं वसुन्धरा पूजा वःपि सकल भक्तजनपिन्त
भारूभू याकेगु, प्रसाद वितरण याकेगु अथवा भव्य नकेगु तकनं याना
उदारता भाव वयनीपिनं मदुगु मखु ।

वसुन्धरा प्रदर्शनी

गुबले नेवाः बौद्ध संस्कृतिकथं बहीद्यो द्वयेगु व बहीद्यो स्ववनेगु
धका दय् छक अर्थात् श्रावण शुक्ल द्वादशीनिसें श्रावण कृष्ण सप्तमीतक
बौद्ध कला, बौद्ध सम्पदायागु प्रदर्शनी जुयाच्चनी । उगु ईले, उगु इवल्य
वसपोल वसुन्धरादेवीयागु नं मूर्ति चित्र पौवाहाः तुलापौ सफू व पूजोप-
करण वस्तुतक नं प्रदर्शनी रूपे व्यवस्था जुयाच्चनिगु जुल । उदाहरणया
लागि थन निगू प्यंगू खँ न्ह्यःव्वया च्वना-

१) ईवहीली	-	लुंसिया श्रीवसुन्धरादेवी
२) न्हायकंवहीली	-	धातुया वसुन्धरामूर्ति
३) दौवाहालस	-	धातुया वसुन्धरामूर्ति
४) बूवहालस	-	लुंसिया वसुन्धरामूर्ति
५) नःवहीली	-	लुंसिया वसुन्धरामूर्ति
६) ववाःबाहालस	-	लुंसिया वसुन्धरामूर्ति
७) श्रीघः	-	लुंसिया वसुन्धरामूर्ति
८) च्वाकंवहीली	-	काष्ठमय वसुन्धरामूर्ति
९) खुंबहालस	-	काष्ठमय वसुन्धरामूर्ति (४ भूजा)
१०) भौरवहीली	-	लुंसिया वसुन्धरामूर्ति
११) न्हायकंवहीली	-	वसुन्धराव्रत उद्धार कथा तुलापौ
१२) ववाःबाहाः	-	वसुन्धराचित्र पौवाहाः

- १३) मुस्याबाहाः — वसुन्धराचित्र पौवाहाः
 १४) थँवहीली — सुवर्णाक्षर वसुन्धराकल्पसूत्र
 स्वयम्भूया चाकलय प्रतिष्ठापित—
 १५) मज्झी चाकलय — प्रस्तरमय चतुर्भुज वसुन्धरा
 १६) शान्तिपुरया चाकलय — प्रस्तरमय द्विभुज वसुन्धरा
 १७) हारतीया चाकलय — प्रस्तरमय चतुर्भुज वसुन्धरा
 १८) हारतीया ल्यूनेसं — प्रस्तरमय पृथ्वी साक्षिस्वरूप वसुन्धरा
 १९) स्वयम्भू मूर्तिसंग्रहालयस — प्रस्तरमय वसुन्धरा श्वया नापं
 वज्रसत्त्व व बैरोचनसहित
 २०) स्वयम्भू वसुपुरया दुने — प्रस्तरमय चिन्तामणिवृक्ष प्रभायुक्त
 पूर्णकलश । श्वया लिकसं वसुन्धरादेवी

वसुन्धराप्रति लोक आस्था

वसपोल वसुन्धरा देवीया अनुस्मरण यायेमात्रं दर्शन यायेमात्रं अथवा स्पर्श यायेमात्रं श्रद्धालु भक्तजनपिसं थुलि श्रद्धानिश्चययाकें अनुप्रेरित जूया आशाभरोसां थथे मत्ति चिन्तन यायेधुंकी कि— विविध अन्नवस्तु, चतुषष्ठीबृटी, अष्टधातु लुँ वहः सिजः आदि एवं हिरामोती, ज्वाहारात, नवरत्न आदि लाभ जुई, सम्पूर्ण अरिष्ट विनाश जुया इह-जन्मे श्रीसुख सम्पत्ति परत्रस मोक्षगति लाभ जुई धैगु भालपाः श्रद्धा-भक्ति निश्चय तथा अनेक प्रकारं पूजा अचना आरावना साधना उपासना याना वईच्चंगु प्रमाण स्वरूप अनेक थितिरीति गुथि एव विभिन्न अभिलेखं स्पष्ट रूपं न्ववाना वईच्चंगु दु ।

वसुन्धराया आवश्यकता

श्व जम्बुद्वीपे मनुष्यपिन्त गृहस्थि जीवन सुचारू रूपं हनेयात, मर्यादापूर्वक स्वायेत थौया त्यागी श्रमण मिश्रुपिन्त जूमानं यथा सुखर्थे जीवनयापन यायेत ईलेविले नये, त्वने, तिये, पुने एवं वास स्थान सुव्यवस्थित रूपं चवनेत कालबिल हनेचने आदि ज्याखंयात मदय्क

मगागु सर्वप्रथम आवश्यक जुयाच्चंगु परम मित्र समानं हित उपकार
याईम्ह स्वपरार्थ साधन निम्ति ताःस्वरूप जुया सम्पूर्ण व्यवहारयागु
आवागमनस अग्रपंक्तिइ लानाच्चंगु श्रीसम्पत्ति धनरत्न द्रव्य जुयाच्चन ।
श्वहे श्रीसम्पत्तिया श्रोत आधार प्रमुख अधिष्ठातृदेवी श्रीवसुन्धरा खः
धैगु प्रमाण थन च्वये वर्णन यानागु उल्लेखं स्पष्ट जूगु दु ।

वसुन्धरा सेवा भक्तिया पुण्य प्रशंसा

गुम्ह श्रद्धालु उपासक उपासिका कुलपुत्र कुलपुत्रीपिसं श्रद्धाभक्ति
निश्चय तथा शास्त्रोक्त विधिपूर्वक भगवती आर्य श्रीवसुन्धराया
उपासना आराधना साधना पुरश्चरण आदि च्वना पूजापाठ स्तोत्र
धारणी मन्त्र परलपा व्रत प्रदक्षिणा आदि याना सेवाभक्ति याई निश्चय
नं उम्ह श्रद्धालु भक्तजनयात इहत्र सुख श्रीसम्पत्ति आयु, यश, प्रज्ञा,
सुख, आरोग्य, धन, जन, श्रुति सप्तवृद्धि लाभ जुया परत्र लोक सुधार
उद्धार निम्ति दयेमाःगु क्रमशः सप्तआर्य धन- श्रद्धा, त्याग, शील,
भय, श्रुत वीर्य, प्रज्ञा, करुणा अभिवृद्धि जुजूं बनी धका प्रशंसा याना
तल । थुगु पुण्यया प्रभावं उम्ह भक्तजनयात न्ह्यावले, न्ह्याथाय् वंसां
च्चंसा मंगल सुखशान्ति प्राप्त जुईगु जुल ।

वसुन्धरा व्रतविधिस तःसिया महत्व

नेवाः बौद्ध संस्कृतिकथं छुं विशेष पर्वदिनस इलेबिले अष्टमिव्रत-
धलं, धर्मधातु रागीश्वर धलं, आर्यतारा धलं, पीठपीठया धलं, दिखास
कीलया धल, अष्टीधलं, गुरुमण्डलया धल आदि धलंया इवलय् वसु-
न्धरायागु नं गतिला धलं दनेगु चलन दु । वसुन्धरायागु बाहेक मेमेगु
देवीदेवताया धलं दनेबले तःसि तयेमाःगु आवश्यक मदु । परन्तु
वसुन्धरायागु गतिला धलं दनेबले जक अनिवार्य रूपं तःसि तयेमाःगु
खनेदु । थुगु गतिला धलंने तःसियागु विशेष महत्व व आवश्यकता दु ।

आ खँ वई छाय् तयेमाःगुले तःसिया छु विशेषता दु, तःसिया छु
स्थान दु, छाय् आवश्यकता जुल थुगु विषय खँ छत्वाचा थन न्ह्यथना
च्चना-

तःसि धैगु सिसाबुसा फलमूलस्कन्द मध्ये उत्तमगु पवित्रगु सिसा-
बुसाया जुगु धयातल । तःसि छगः भूमी पिनाबिल धाःसा उगु तःसियाकें
विविध किसिमया सिसाबुसा अंकूर चुलिजाया वई धाई । अकि थुगु
तःसियात संस्कृत भाषं वीजपुरकफल धका धयातल । थुकियागु अर्थकथं
नेपालभाषं तःताजिया सि सईगु जुयाहे थुकिया नां भी भाषा वैज्ञानिक-
पिसं पाय्छि जुईक तवसि धैगु नामकरण यानाबिल । थुकियागु अपभ्रंश
जुया तःसि धायेगु चलन जुल । थ्वहे तःसियात धार्मिक सांस्कृतिक
दृष्टि सर्वनिधिरत्न फलया शुभ प्रतीक रूपय् आस्था प्रतिष्ठा तथा सन्मान्
याना वईच्वंगु जुल । थ्वहे कारणं याना सम्पूर्ण निधि दर्शन लाभ जुई
धैगु पवित्र उद्देश्यकथं वसुन्धराया व्रतपूजा विधिस तःसि तथा पूजा
यायेगु भीगु परम्परा व आदर्श जूगु जुल । अकि वसपोल भगवती
आर्य वसुन्धराया नीजि सचिव अथवा प्रमुख हजुरी जुयाच्वंम्ह जम्बल-
जलेन्द्र नाम जुयाच्वंम्ह कुवेरं वीजपुरक (तःसि) व नवचा धारण याना
च्वंम्ह धका वर्णन याना तल । गथेकि—

सुवर्णवर्ण लम्बोदरं सर्वालंकारधरं
वामदक्षिणहस्ताभ्यां नकुलीवीजपुरकधरं
रत्नसम्भवमुकुटं उत्पलमालाधरं . . .

वसपोल जम्बलजलेन्द्र धैम्ह सुवर्णया वर्ण तःग्वगु प्वाः जुया सकल
प्रकारया तिसां तिया खःगु ल्हाती नवचा ज्वना, जःगु ल्हाती वीजपुरक
तःसि धारण याना च्वंम्ह । रत्नसम्भवयुक्त मुकुटं पुया पलेस्वाँया माला
क्वखाया शोभाय्मान जुयाच्वंम्ह धका वर्णन यानातःगु जुल । थ्वहे
जम्बलजलेन्द्र स्वरूपं वसुन्धरा-व्रतपूजा-विधानकथं वसुन्धरा मण्डले
न्होने तथा पूजासत्कार याना वईच्वंगु जुल । थुगु तःसि पूजाविधिस
म्हासु(पीत)वस्त्र आशन तथा विधिवत् पूजा याना आचार्यजुं साधनयुक्त
व्रतसूत्र का ज्वना न्हूगु वा हायेका च्वंतले आचार्य जम्बलजलेन्द्र व
वसुन्धराया मन्त्र जप यानाच्वनी । लिसें व्रतीजनपिसं जक वसुन्धरा
देवीयागु धारणी परलपा च्वनिगु जुल । थुगु पूजा सिधयेवं मण्डल
विसर्जन याना वसुन्धरायागु महाप्रसाद रूपय् साधनयुक्त थुगु तःसि

लानायंकालि थःथःगु छेँ आदरपूर्वक सुरक्षित याना तयातईगु प्रभावं उम्ह भक्तजनया छेँ क्रमशः अन्न धन रत्न ऐश्वर्यं सुख प्राप्त जुई धैगु भालपा निश्चय याना च्वनिगु जुल । पूजा सिधय्का थुगु तःसियात थथे स्तोत्र व्वना नमस्कार याई-

ॐ नमः श्री जम्बलाय । धनेश्वरं पीतवर्णाभं
सर्वैश्वर्यधनाधिपम् । सर्वसत्त्वपरितोषं
कुवेरं प्रनमाम्यहं ।

जलगालय् जम्बलजलेन्द्र

नेपाःया बौद्ध संस्कृति बौद्ध परंपराकथं गुगु नं विहारे स्थापना याना तःम्ह क्वापा आजु मूल भगवान् बुद्धया सम्मुखय् जलपात्र जलगाः छगू छगू तयातइगु खः । थुगु जलगालय् वसुन्धराया धर्मपाल रूपय् जम्बलजलेन्द्र कुवेरया पारिवारीक चिचीविकपि मूर्तित लखय् दुने खने मदय्क लखंभरेयाना गुप्तरूपं तयातइगु । थुगु जलगाःया जलप्रसाद काःपि श्रद्धा निश्चय दुपि भक्तजनपिन्त रोगव्याधि हरण जुइगु लिसेँ धन धान्य रत्न लाभ जुई धैगु छगू परम्परा व विश्वास खः । थ्व थिति नं नेपाःया बौद्ध परम्पराया थःगुहे विशेषता खः । थुगु किसिमं जलगालय् वैश्रवण कुवेरया मूर्ति तयेगु परम्परा थौंकेन्हे अप्व बौद्धतय्सं लोमंके धुकल धाःसां ज्यू । अज्ज थुगु परम्परा विलकुल लोप हे जुल धका नं धाय्मज्यूनि कारण थुजागु थितिरीति परम्परा गुगु विहारे ल्यनाच्वंगु दनि । धाय्कि उदाहरणया लागि यल हिरण्यवर्ग विहार व रूद्रवर्ग विहारस अद्यापि प्रचलन दनी ।

वसुन्धराप्रति आधुनिक सेवा

वसपोल वसुन्धराप्रति आस्था प्रतिष्ठा तया थिथी प्रकारं सेवा भक्ति याना वईच्वंगु खँ समय परिस्थिति अनसारं विभिन्न रूप शैली फरक जूगु खनेदु । धाय्कि थौंया वैज्ञानिक युगे साधना उपासना पुर-श्चरण एवं भक्तिभाव स्वयानं उप्व प्रचार प्रसारयागु युग जूगु निम्ति

समय सापेक्षयागु माग अनुसार वसुन्धरा सम्बन्धी साहित्य, संगीत, चित्र यत्रतत्र उपलब्ध जूगु खनेदु । धाय्कि उदाहरणया लागि—

१) पं. निष्ठानन्द वज्राचार्यजुं वसुन्धरायागु उपादेयता विषय कया थम्हं अनुवाद व सम्पादन याना बिज्यागु बुद्धजीवनी ललितविस्तर सफू प्रकाशनया इवल्य् मुचन्द्रगृहस्पति महाजनं वसुन्धराया सेवाभक्ति यागु कथा प्रकाशन यात ।

२) पं. देवानन्द वज्राचार्यजुं स्वयम्भू पुराणयागु आधार कया 'स्वयम्भू दर्शन' नांगु नेपाल भाषं पद्य रचना याना थ्वयालिसें सूर्योदय राजां वसुन्धरा सेवाभक्ति याःगु आधार कया 'शरणमहालक्ष्मी' धैगु वसुन्धराया म्यें रचना याना प्रकाशन याना बिल । थुगु म्येंयागु रचना-शैली व लययात कया आपालं भक्तजनपिसं थाय्थासे प्रचार प्रसार याना व्यगु खनेदु । थुगु म्येंया गुलि लोकप्रियता अभिवृद्धि जुल, उलि अन्य देवी देवीपिंगु म्यें नेपालभाषं प्रचार जूगु खनेमदु ।

३) पं. आशाकाजी वज्राचार्यजुं सूर्योदय राजाया संस्कृत भाषं च्वयातःगु सफूयात नेपाल भाषं अनुवाद याना प्रकाश याना बिल ।

४) पं. रत्नकाजी वज्राचार्यजुं वसुन्धरायागु विमलावती बाखँ नेपाल भाषं अनुवाद याना प्रकाश यात ।

५) भाजु सूर्यमान वज्राचार्यजुं वसुन्धराया महत्वबारे थःगु बिचाः खँ प्वंका "शरण महालक्ष्मी" म्यें पुनः संस्करण याना प्रकाश याना बिल ।

६) पं. बद्धीरत्न वज्राचार्यजुं वसुन्धरा व्रत दनीपिंगु निम्ति उप-योगी जुइगु कथं वसुन्धरादेवीया व्रतविधि कथा प्रकाशन याना बिल ।

७) यल नागबाहाया ज्ञानमाला भजन खलकं वसुन्धरायागु संक्षिप्त परिचय सहित वसुन्धराया "शरणमहालक्ष्मी" म्यें नेपाल भाषं प्रकाशन याना बिल ।

८) लिपि विशेषज्ञ हेमराज शाक्यजुं वसुन्धराया प्राचीन मूर्तियागु फोटोचित्र प्रकाशन यानालि वसुन्धराया धारणी व स्तोत्र प्रकाशन याना बिल ।

९) साहित्यकार अष्टमुनि गुर्भाजु वसुन्धराया व्रत बाखै सफू नेपाल भाषा प्रकाशन यांना बिल । थुकी साहित्यकार भाजु फणीन्द्ररत्न वज्जाचार्यजुयागु थःगु मन्तव्य नं दुथ्याका तःगु दु ।

१०) मय्जु सुश्री चुन्दा वज्जाचार्यजुं ने. सं. १११४ न्हूदँया लसताय् वसुन्धराया उपादेयता विषय कया विश्वभूमि नांगु पत्रिकास छप्पु च्वसु प्रकाशन यांना बिल ।

११) कलाकार सिद्धिमुनि शाक्यजुं वसुन्धराया सुन्दर कलात्मक चित्र च्वया प्रकाशन यांना बिल ।

१२) कलाकार गौतमरत्न वज्जाचार्यजुं वसुन्धराया सुन्दर कला-त्मक मण्डल च्वया प्रकाशन यांना बिल ।

१३) पं. रत्नकाजी वज्जाचार्यजुया निर्देशनकथं नेपाल कला मण्डलपाखें वसुन्धराया शास्त्रीय नृत्य दबुली हुया कथन ।

१४) ज्योतिष वैद्य रत्नराज वज्जाचार्यजुं वसुन्धरायागु अष्ट-शतोत्तर नाम स्तोत्रपाठ प्रकाशन यांना बिल ।

१५) संस्कृतविद् लिपि विशेषज्ञ हेमराज शाक्यजुं वसुन्धरा देवीया अनुसन्धानात्मक च्वसु च्वया नेपालभाषा प्रकाशन यांना बिल ।

१६) लोटस रिसर्च सेन्टर संस्थाया अनुसन्धान अधिकृत भाजु 'महेन्द्र रत्न शाक्यजुं 'वसुन्धरादेवी छगू अध्ययन' नामक सफू नेपाल भाषा प्रकाशन यांना बिल ।

१७) स्वयम्भू ज्ञानमाला भजन संघपाखें वसुन्धरायागु "शरण-महालक्ष्मी" नामक म्येया क्यासेट प्रकाश यांना बिल ।

१८) कलाकार सिद्धिमुनि शाक्यजुयागु चित्रयात पुनर्संस्करण यांना वसुन्धरायागु सुन्दर कलात्मक चित्र भाजु भीमबहादुर शाक्यजुं दिवंगत थव माँया नामं यल दीपयात्रा मतयाःया लसताय् प्रत्येक विहार व चैत्य पत्तिकं समर्पण यांना ब्यूगु जुल ।

१९) कलाकार सिद्धिमुनियागु वसुन्धराया चित्रयात थेमिया ल्याय्म्हुचःयागु सौजन्यपाखें ने. सं. १११४ या न्हूदँया लसताय् क्याले-न्डर प्रकाशन यांना बिल ।

२०) भिन्छेबाहाया वसुन्धरा पूजा खलकें वसुन्धरा पूजाया लसताय् वसुन्धराया रंगीन चित्र च्चका फ्रेम समेत तथा छपा छपा नं छाया वल ।

२१) युवक बौद्ध मण्डलया ज्याइवः कथं युवा महोत्सवया लसताय् नेपाल कला मण्डलपाखें तयार जूगु शास्त्रीय वसुन्धरा नृत्य अक्षेश्वर महाविहारे हुईकल ।

२२) यल तःलाछि टोल निवासी श्रद्धालु दानपति आकाशदेवी उपासिकाया विशेष कुतलं वय्कःया श्रीमान् सिद्धिराज तुलाधर प्रमुख सकल परिवारया सद्धर्मचित्त उत्पत्ति जुयाव थःगु निवासस्थानस वसुन्धरा मूर्ति स्थापना याना वसुन्धरा देगः निर्माण याना दिल । थुगु लसताय् छगू न्हूगु वन्देज दयेका प्रतिवर्ष वसुन्धरापूजा न्यायेकेगु व्यवस्था समेत याना दिल । हानं छुं वर्षलीपा थुगु पूजा चिरस्थायी हेतु छगू लाख दां अक्षयकोष तथा वसुन्धरापूजा व्यवस्था कमिटि दयेकल । थुगु कमिटि प्रसिद्ध समाजसेवी श्री बुद्धिराज वज्राचार्यजुया अध्यक्षताय् गठन जूगु जुल ।

वसुन्धराव्रत गतिला धलंदनेगुया तजिलंजिया ज्याइवः

नेवाः बौद्ध संस्कृतिकथं थःगुहे परम्परा अनुसार श्री वसुन्धरा देवीयागु आराधना व साधना उपासनायाना भाद्रकृष्ण तृतीया गतिला धलं दनीबले कुशल आचार्य गुरुवज्राचार्यया निर्देशनकथं सकल व्रतीजन उपासक उपासिका कुलपुत्र कुलपुत्रीपि उपस्थित याका धलंशाला भः भः धायेका शोभायमान याना वसुन्धरा महामण्डल दयेका तानत्रितान इलां तथा छत्र ध्वज पताका सजेयाना वसुन्धराया प्रतिमा व पौभाः तुलाँपौ आदि ब्वया धलंशाला श्री शोभावृद्धि यानातईगु जुल । थुगु रूपं धलंशाला तयार जुसेलि अन पंचभावना (स्थान, समय, धर्म, स्वयं, एवं बोधिसत्व) याकें परिलक्षित याना लिसें श्रद्धा, भाव, भक्ति, क्रिया, आदर निश्चय सहित याना शास्त्रोक्त विधिपूर्वक निम्नप्रकारं ज्याइवः न्ह्याकिगु जुल ।

वसुन्धरा धलं दने न्हा ह्खुन्हु पूर्वसेवा मण्डलाधिवासनया क्रियाकर्म—

धूसः यायेतः—

- १) सर्वप्रथम धलं दनेगु थास भूमिशोधन याये ।
- २) वसुन्धरा बिज्याकैगु महामण्डल थाये ।
- ३) उगू मण्डलस बृहीनं उयेके निम्ति पुवा कूछि, स्वाँवा कूछि, स्वाँ कूछि, तछ्व कूछि, माछ्व कूछि, कयगु कूछि, ताय् कूछि, आख्य कूछि,
- ४) थुगु ज्या सिधयेवं मण्डलया दथुस श्री वसुन्धरादेवी स्थापना याये ।
- ५) ध्वया लिकसं आसन त्रिखुति मेच छगू तया पूर्णकलश च्वया तःगु धंपकलश स्थापना याये ।
- ६) थुगु मूलकलश धंप्य् छ्वालं अष्टकलश धंप चाहुके थथे—

पूर्वस	—	नवचा अंकित धंप
दक्षिणस	—	रत्न " "
पश्चिमस	—	भद्रघट " "
उत्तरस	—	पिला " "
आग्नेय	—	चामर " "
नैऋत्य	—	छत्र " "
वायव्य	—	ध्वज " "
इशान	—	पताक " "

थुगु कलश धंपपत्तिकं गर्भस तये—तीर्थया लंख, सादुर, पंचामृत, पंचबृही, पंचगन्ध, पंचपल्लव, दाप्पस्वाँ कच्चा, स्वतलूगु छत्र, पीतवस्त्र, ईकापकानं ताडन तये, दृष्टि नं ख्यले । थापंकि तया लुँपले वहपले कवयखचाः तये । कवयखचाः खिपतं उयकं चिनातये । थुलि कलशासन तये पीतवस्त्र सूत्रं उयके जुल ।

- ७) थुगु वसुन्धरा मण्डलया न्ह्योने बीजकलश, गणेश, महाकाल, सगुनपति, गोग्रास, ज्वलन्हेक, सिन्हमू, सुकुन्दामत, लोकपालबलि, दिगबलि, महाबलि मर्यादापूर्वक स्थापना याये ।

- ८) वसुन्धरा मण्डलस जवस वसुन्धराकल्पसूत्र धारणी पुस्तक, सुवर्ण-

पिण्डपात्रस स्वाहाकार ध्यावा तया व थ्वया दद्योने श्री जम्दल-
कुवेर स्थापना याये । थुलि मण्डल स्थापनाया मर्यादाक्रम
ज्याइवः जुल ।

१) थुलि थापँया क्रियाकर्म सिधयेकालि न्हापां सूर्यार्ध याये । गुरु
पादार्ध याये । पंचगव्य शोधन यायेधुंकालि सकसित नं पंचगव्य
बियेधुंका पूजाभः ज्वलं न्ह्यच्याये ।

१०) पुजाभः ज्वलं लःल्हाये धुनेवं आचार्य नं गुरुमण्डल दनके ।

११) लंख बलि बियाव विसर्जन याये ।

१२) थुलि क्रिया सिधयेवं कायभः पूजा ।

१३) रहस्यमण्डल दनके रहस्यकि काये ।

१४) त्रिसमाधि दने, समाधि दनेसिधयेवं ।

१५) मण्डलया न्ह्योने स्थापना यांना तयागु कलश, इनाय, महांकाल,
सगुनपति, गोप्रास, ज्वलान्हेकं, सिन्हमू, मत, थुलि क्रमशः पूजा
याये ।

१६) थन जाप, धूप, निराञ्जन, आकर्षण, पादार्ध आदि पुष्प न्यास
याये ।

१७) थ्वयालिमें पूजालास्या, स्तुति यांना मत बिये, येधर्मा गाथा ब्वने ।

१८) थनलि वमुन्धरामण्डन अविष्ठान याये । संखोदक लखं मण्डलस
अभिसिचन याये ।

१९) थनलि जाप धूप, निराञ्जन, मतकं ताचां त्वये ।

२०) ध्यान आकर्षण, पादयादि पुष्प न्यास याये ।

२१) थुलिसिधयेका मण्डलस स्वाँ ब्वये ।

२२) स्वाँ ब्वयेधुंका पंचोपचार पूजा यांना लास्यामुद्रा कया स्तुति याये ।

२३) स्तुति यायेधुनेवं मत बियाः येधर्मा गाथा ब्वने ।

२४) थुलि सिधयेवं चतुर्दिगस धारामण्डल थिले ।

२५) पंचोपचार पूजा मत, येधर्मा गाथा ।

२६) थुलि सिधयेवं अनलि जम्बलपूजा याये ।

२७) देवख्यः चायेका स्नान याचके ।

- २८) स्नान याकैधुनेवं क्रमशः जाप, धूप, आकर्षण पादार्घ, आदि पुष्पन्यास याये ।
- २९) जम्बलयात स्वाँ ब्वये पंचोपचार स्तुति याये ।
- ३०) नैबद्यादि मत येधर्मा ब्वने ।
- ३१) थनंलि वसुन्धराया धारणी पुस्तक पूजा याये ।
- ३२) वसुन्धरापूजा जाप, धूप, निराञ्जन, मतफँ ताचँ त्वये ।
- ३३) आकर्षण पादार्घ पुष्पन्यास ।
- ३४) स्वाँन ब्वये ।
- ३५) पंचोपचारपूजा लास्यास्तुति ।
- ३६) धारामण्डल थिले, पूजा याये ।
- ३७) म्हासु सिन्हः, म्हासु जर्जका, म्हासु स्वाँ छाये । मत येधर्मा ब्वने ॥
- ३८) थुलि क्रिया सिधयेवं थनंलि महाबलि बिये ।
- ३९) चक्रपूजा छ्वये ।
- ४०) देगुरी बलि बिये ।
- ४१) स्नान कितने ।
- ४२) गुरु आचार्य पूजा याना यथाशक्त गुरुदक्षिणा बिये ।
- ४३) शंखलंख स्वादन याये, क्षमापन याये ।
- ४४) विसर्जन याये मण्डलया स्वाँ क्वकाये । जजमानपि सकसितं बिये ।
थुलि मण्डलाधिवासनया क्रियाविधि जुल ।
- ४५) थुलि विधि सिधयेवं समयाचक्र याये । थनंलि यथाशक्त भोजन याके ।

थुलि धूसःया क्रिया जुल ।

थुलि धूसःया क्रिया सिधयेवं कन्हेखुन्हु वसुन्धराव्रत गातिला धलं दनेगुया विधिविधान क्रिया आरम्भ जुई-

- १) सर्वप्रथम वसुन्धराव्रतया आवश्यक पूजासामग्री ताःलाका पूजा-ज्वलं न्ह्योनेसं प्रस्तुत याये धुनेवं न्हापालाक विधियें सूर्यार्घ याये, गुरुपादार्घ तथा पंचगव्य शोधन याना सकसितं वितरण यायेधुंकालि
- २) गुतुनं बुद्धधर्म शुभारम्भ यायेत दकले सकले न्हापालाक त्रिशरण

वनेत बोधिवित्त उत्पत्तिकथं पूजाभःया शुभ संकल्प निमित्तं स्वस्ति
महादान वाक्य ब्वना निमित्त कायेगु ज्या जुई । थुगु उद्देश्यकथं
गनं गुगु थासे गुगु दिनस छु उद्देश्यं शुभ संकल्प यांनागु विषययात
कया सुन्दर पदच रचना यांना तईतःगु वाक्य परलपेगु ज्या जुई ।
थुगु पूजा संकल्प यांनागुलि पूजा संभार शुद्ध व अभिवृद्धि कामना
यासैं शुद्ध हृदय नं पुष्पकेतुराज तथागतयागु धारणी ब्वनालि
अनंलि स्वस्ति महादान वाक्य ब्वनी ।

३) संकल्प वाक्य ब्वने सिधयेवं उगु पूजाभः जजमानं गुरु आचार्ययात
लःल्हाना बिई ।

४) जजमानयाकें गुरुजुं पूजाभः लःल्हाना कायेधुनेवं थःम्हं गुरुमण्डल
दने । लंख बलि बिये, विसर्जन याये । अले कायभः पूजा यांना
जजमानयात रहस्यस्यमण्डल दनके । रहस्यमण्डलकि कायेधुनेवं
गुरुजुं वसुन्धरायागु समाधि दनेजुल ।

५) थुगु समाधि आरम्भ यायेन्ह्यो गुरुजु नं ज्वना जाकि लाहात
ज्वजलपा ब्वित्ति यांना श्री वसुन्धरायात नमस्कार यांना वसुन्धराया
ध्यानगाथा परलपे । उगु गाथा थथे खः—

ॐ नमः श्रीवसुन्धरायै । भगवती वसुधारे
ज्ञानमूर्ति नमाम्यहं । गगनगुण मनोरथा
तारणीमन्त्रदेवी । असमगुणनिधाने काञ्चन
रत्नवर्षा वहूजनधनवृद्धि सागरारत्नमुकुटं ।...

थुलि घया आकाशे जाकि थतिना छ्दये । अले ध्यानगाथा ब्वने—

मैत्रीकरुणामुदितोपेक्षा स्वभावशुद्धा सर्वधर्मणि
स्वभावशुद्धोऽहं शून्यताज्ञानवज्र स्वभावात्मकोहं
विभाव्य हृदिस्थित पंकारेण विश्वदलपद्मकर्णिको—
परि चन्द्रसूर्यमण्डलं तदुपरि त्रुंकारेण तदुपरिणामेन
भद्रघट पूर्णघट परिणामेन भगवती वसुन्धरा भावयेत् ।
षड्भुजा पीतवर्णा एकमुखी रत्नमुकुटधारिणी
सव्यप्रथमभुजेन निधिवारदं द्वितीयेन

रत्नमञ्जरीं तृतीयेन तथागतवन्दनाक्षमालाधरां
वामप्रथमभुजेन भद्रघटं द्वितीयेन धान्यमञ्जरीं
तृतीयेन प्रज्ञापुस्तकधारणीं ललितासनस्थितां
सर्वालिकारभूषितां नवयौवनसम्पन्नां
भगवतीं वसुन्धरां स्वरूपोहं भावयेत् ।

- ६) थुलि ब्वना भावना यायेधुनेवं न्यास याये ।
७) अंगन्यास शंखाधिष्ठान पुष्पाधिष्ठान याये ।
८) थनलि विघ्नोत्सारण मन्त्र ब्वने ।
९) थन भगवती वसुन्धरा आकर्षण याये ।
१०) वसुन्धरायात जहूँवहोः पुष्पन्यास याना स्वाँन ब्वये कंथ थथे—

मध्यस	—	वज्रधरसागरनिर्घोषतथागतयात
जवस	—	आर्यावलोकितेश्वरयात
खवस	—	वज्रपाणीयात
खवस	—	ईलादेवीयात
न्होने	—	जम्बलजलेन्द्रयात
जवस	—	वरुणयात
खवस	—	चीविकुण्डलीयात
आग्नेय	—	केलीमालिनीयात
नैऋत्य	—	मोक्षेन्द्रादेवीयात
वायुव्य	—	चरेन्द्रादेवीयात
ईशाने	—	गुप्तादेवीयात

थ्वयानं पिनेपाखे—

आग्नेय	—	सुगुप्तादेवीयात
नैऋत्य	—	सरस्वतीदेवीयात
वायुव्य	—	चन्द्रकान्तादेवीयात
ईशान	—	माणिभद्रयात
पूर्व	—	पूर्णभद्रयात
दक्षिण	—	धनेन्द्रयात

पश्चिम	—	बैश्रवर्गयात
उत्तर	—	कुबेरयात
पूर्व	—	सुराधिपति इन्द्रयात
दक्षिण	—	प्रेताधिपति यमयात
पश्चिम	—	नागाधिपति वरुणयात
उत्तर	—	यक्षाधिपति कुबेरयात
आग्नेय	—	तेजाधिपति अग्नियात
नैऋत्य	—	राक्षसाधिपति नैऋत्ययात
वायुव्य	—	पवनाधिपति वायुयात
ईशान	—	भूताधिपति ईशानयात

- ११) थुलि स्वाँ ब्वये धुनेवं पंचोपचार पूजा लास्यास्तुति
 १२) थनं पापदेशना याये
 १३) थनं मुकुट पूजा
 १४) कलश पूजा धुंकालि मण्डल अधिष्ठान याये ।
 १५) पीतसूत्रकानं वसुधरायाके क्यंकाव जाप धूप याये ।
 १६) निराञ्जन मनफँ तरचां त्वये ।
 १७) आकर्षण पादचार्घ्य पुष्पन्यास याये ।
 १८) स्वाँनं ब्वये ।
 १९) पंचोपचार पूजा लास्यास्तुति याये ।

स्तुति थथे खः—

कल्पोदितेन विधिनोपरि पथ्यमाण
 याधारणाय विविधरत्न सुवर्णमर्या
 पूर्णं करोति भुवनं सहस्रैव सर्वं
 तां सर्वलोकजननीं प्रणमामि भक्त्या
 त्वं देवी सर्वगुणरत्ननिधानभूता
 सत्त्वार्थकार्या धनधान्यसमृद्धिहेतो
 दारिद्र्यदुःखं शमते नराणां
 तां नमामि शिरसा तव पादपद्मे ।

- २०) चतुर्दिगर्ष धारामण्डल थियर्क पूजा, मत ये धर्मा
- २१) थुलि क्रिया सिधयेवं जम्बल पूजा याये ।
- २२) स्नान याके क्रमशः जाप, धूप, आकर्षण, पादार्घ पुष्पन्यास याये ।
- २३) स्वाँन ब्वये पंचोपचार पूजा लास्या स्तुति ।
- २४) नैवदच मत ये धर्मा ब्वने ।
- २५) थनंलि देवपूजा जाप धूप ध्यान निराञ्जन मतफँ ताचां त्वये ।
आकर्षण, पादद्यादि याना स्वाँ ब्वये । पंचोपचार लास्यास्तुति
मत ये धर्मा ।
- २६) धनंलि महाबलि ब्विये सिधयेवं पाठ ग्वये ।
- २७) थनंलि उपस्थित धलंइंविं व्रतीजन सकलें मर्यादापूर्वक थःगु
थासे च्वने ।
- २८) न्हापां शंखलंख व पंचगव्य ब्विये । लाहात चाय्के पूजामः संकल्प
याके । धलं दनके गुरुमण्डल दनालि लंखबलि ब्विये विसर्जन याये ।
अनंलि निराञ्जन, मतफँ ताचां त्वये । थुलि क्रिया सिधयेवं त्रिरत्न
पूजा आरम्भ याये ।
- २९) गुरुमण्डल थीका थुगु गाथा ब्वने—
सर्वताथागतं शान्तं धैगु ब्वना नमस्कार याये ।
- ३०) नमस्कार याये धुनेवं दथुस च्वंगु बुद्धमण्डलस लंख जाकि पादार्घ
तये । स्वाँ ब्वये, पंचोपचार पूजा याना स्तुति ये धर्मा ब्वने । थुलि
धुंका स्वाँजाकि स्वक आकाशे थतिना—
समन्वाहरतु मां बुद्धा अशेषा दिक्षु संस्थिता वाक्य ब्वने ।
- ३१) थनंलि गुरुनं जुलसां देशना खँ कने ।
- ३२) शिष्यं प्रार्थना याके ।
- ३३) स्वाँ छप्पवः ज्वंका बुद्धमण्डलस अधिष्ठानयाके
- ३४) निर्यातिन वाक्य ब्वंके ।
- ३५) बुद्धमण्डलस लंखबलि ब्विये ।
थुलि बुद्धमण्डल पूजा जुल ।



- ३६) थनंलि धर्ममण्डल दने ।
 ३७) धर्ममण्डलस थियाव अधिष्ठान याये ।
 ३८) लंख जाकि पादार्ध तये ।
 ३९) धर्ममण्डलस स्वाँ ब्वये ।
 ४०) पंचोपचार पूजा स्तुति याये ।
 ४१) थनंलि जाकि ज्वना विन्ति याना च्वने ।
 ४२) आचार्य नं देशना खँ कने ।
 ४३) स्वाँ ज्वंका निर्यातन याये ।
 ४४) स्वाँ छाया लंखबलि बिये ।
 थुलि धर्ममण्डल पूजा जुल ।



थनंलि संघमण्डल पूजा—

- ४५) संघमण्डल थियाव अधिष्ठान याये ।
 ४६) लंखजाकि ज्वना पादार्ध तये ।
 ४७) स्वाँ ब्वये ।
 ४८) पंचोपचार पूजा स्तुति याये ।
 ४९) विन्ति याकाव देशना खँ खने ।
 ५०) स्वाँ ज्वंका निर्यातन याये ।
 ५१) लंखबलि बिये । क्षमापन विसर्जन याये ।
 थुलि संघमण्डल पूजा जुल ।



त्रिरत्नमण्डल पूजा सिधयेवं वसुन्धरामण्डल पूजा आरम्भ याये—

- ५२) न्हापां भूमि शोधन लंख हाहा याये । लिसे पंचगन्ध नं इले ।
 ५३) वज्र नं भूमिस थिये ।
 ५४) थनं मण्डल थाये ।
 ५५) मण्डलस थियाव अधिष्ठान याये ।
 ५६) थनं दाफस्वाँ व किगः स्वकः थतिने ।
 ५७) हानं दाफस्वाँ व किगः ज्वना च्वने, वसुन्धरा थःगु थास बिज्याहुँ
 घका वाक्य ब्वने ।

५८) स्वाँ मण्डलस तयेके वाक्य ब्वने ।

५९) किगः ज्वनाव अध्येषन मुद्रा यासे, शिष्यनं प्रार्थना याये । गुरुनं थनं देशना खँ कने—

थुथास वसुन्धराया व्रतविधि नियम वा उद्देश्य एवं वसुन्धराया मण्डलया ध्यान, दश पापकर्मया फलविपाक निर्देशन व तिलाव्रतया उपयोगी पुण्यप्रशंसा विषयकया आचार्य नं विस्तारपूर्वक खँ कने ।

६०) थुलि खँ न्यनेधुनेवं व्रतीजन सकसिनं थव थव मण्डलस पूजा याके ।

६१) न्हापां जाकि लंख कया व मण्डलस पादार्थ याके ।

६२) थनं स्वाँ छप्पः ज्वंका वाक्य ब्वना मण्डलस तयेके ।

६३) थन वसुन्धराया मण्डलस च्वंप्पि वाह्य, गुह्य अभ्यन्तरया देवी-देवताया नां कया स्वाँ ब्वये ।

६४) थुलि धुनेवं म्हासु सिन्हः, म्हासु वस्त्र, जजंका, म्हासु स्वाँ स्वाँमाः आदि छाये लिसें नैवदद्यादि मरिचरि, फलमूल, खलूमरि गव्य ग्वाः पर्यन्त छाया कपूमत म्हासु इताः मत बिये दानदक्षिणा द्रह्लपे धुनेवं ताय्, अविर, अक्षता आदि ह्वला ये धर्मा गाथा ब्वने । थन वसुन्धराया गुणवर्णन प्रशंसा स्तुति याये ।

६५) थुलि क्रिया सिधयेवं बीजपूरफल तःसि तयाव पूजा याये । पीत वस्त्र आशन तये, क्रमशः पादार्थ तया स्वाँ ब्वये । स्वाँ ब्वयेधुंका पंचोपचार पूजा निमित्त म्हासु वस्त्र, म्हासु सिन्हः, म्हासु स्वाँ, चित्रविचित्रयागु स्वाँ द्रह्लपा नैवदद्य मत फलमूल छाये । धुं, मत, ताय् अक्षता ह्वला ये धर्मा ब्वने स्तुति याये ।

६६) थुलि सिधयेवं चाकः पूजा याये ।

६७) चाकः पूजा धुनेवं गुरु आचार्य उपाध्यायपिन्त पूजा याना दान-दक्षिणा बिये ।

६८) व्रतीजन सकसिनं म्हाति म्हाति किभुनिसला द्रह्लपे ।

६९) थव थव मण्डलस क्षमापन याये ।

७०) व्रतसूत्रका ल्हातस धारण याये ।

७१) व्रतीजन सकसितं सिफँ लुये ।

- ७२) वज्ररक्षा तथे ।
 - ७३) क्षमापन विसर्जन याये ।
 - ७४) गुरुपूजा दक्षिणा विये ।
 - ७५) आशिर्वाद विये ।
 - ७६) व्रतीजन सकसितं कलशया लंख अभिषेक विये ।
 - ७७) वसुन्धराव्रत—विधि सुसम्पन्न जूगु प्रसाद स्वां विये ।
 - ७८) थनंलि थःथःगु मण्डल वयें ।
 - ७९) मण्डल वयागु पूजाया अवशेष वस्तु नदीतीर्थस चुईके छवये ।
 - ८०) थनंलि व्रतीजन सकलसियां पालं याये ।
- थुलि वसुन्धराव्रत गातिला धलंया कार्यक्रम जुल ।



गातिला धलं सतिखुन्हुया विधि—

- १) न्हापां कलश, गरुणेश, गोप्रास, न्हेकं, सिन्हःम्, श्रीलक्ष्मी, वादा-
किदा, जक्षजक्षनी, नागग्वं, इनायक्वं, शिवशक्ति श्वयालिसं
जग्यशाला दयेकाव पूजा याये ।
- २) गुरुमण्डल दने ।
- ३) देगुरीपूजा ।
- ४) त्रिसमाधि दने ।
- ५) कलश पूजा याये ।
- ६) श्रीलक्ष्मी, जक्षजक्षनी, नागग्वं, इनायक्वं, शिवशक्ति समेत
पूजा याये ।

थुलि पूजा सिधये धुंकालि—

- ७) जग्य होम याये ।
- ८) ज्ञानाहूति धुंका वसुन्धरामण्डल जम्बलदेवता प्रतिमा पूजा याये ।
- ९) जाप, धूप, आकर्षण, पादचादि पुष्पन्यास, पंचोपचार पूजा, दीप
ये धर्मा ।
- १०) देवताहूति विये ।
- ११) वसुन्धराकल्पसूत्र आदि पाठ याये ।

- १२) थुलि क्रिया सिधयेकालि व्रतीजन सकल थःथः थास चवने ॥
- १३) सकसितं गुरुमण्डल दनके ।
- १४) वसुन्धरादेवी पूजा ।
- १५) जम्बलपूजा ।
- १६) स्थानपूजा ।
- १७) चक्रपूजा ।
- १८) व्रतसूत्रका लहानातयागु प्यनाव ज्वनातये ।
- १९) वसुन्धरा मण्डलस प्यनाव तयागु व्रतसूत्रका प्यनाव वंभूलसहित
सकल व्रतीजनं ज्वंकाव खँ कने ।
- २०) थुलि खँ न्यने धुनेवं व्रतसूत्रका सिन्हलं बुलाव महामण्डलस दुतिने
जुल ।
- २१) थनं भूल बलि बिये ।
- २२) स्वान कि तने ।
- २३) गुरुपूजा याये, दक्षिणा बिये ।
- २४) क्षमापन याये, कलशाभिषेक बिये ।
- २५) विसर्जन याये ।
- २६) महामण्डलयागु रज वये । खुशिस पूजा हायेकं चुयेके ॥
- २७) थन कुमारीपूजा आरम्भ याये ।
- २८) सिन्ह मोहनी आगं तया कुमारीपूजा छवये ।
- २९) कुमारीप्रसाद काये ।
- ३०) समयाचक्र याये ।
- ३१) थनं भोजन याये ।
- ३२) स्वां प्रसाद व मुखशुद्धि काये ।

थुलि गातिलाया वसुन्धरा व्रतविधि सम्पूर्ण जुल ।



वसुन्धरा स्तोत्र—

भगवतीवसुधारे ज्ञानमूर्तिस्वरूपिणी
गगनगुण मनोरथा तारणी मन्त्रदेवी
असमगुणनिधाने काञ्चनरत्नवर्षी
बहूजन धनवृद्धि सागरारत्नमुकुट २—
सर्वालङ्कार भूषित नवयौवन सम्पन्ना
तस्यै श्रीवसुन्धरां सर्वदाहं नमामि ।

वसुन्धरा ध्यान—

स्वहृदि स्थित पङ्कारेण विस्वदलपद्मकर्णिकोपरी
चन्द्रसूर्यमण्डलं तदुपरि त्र्यङ्कारेण तदुपरिणामेन
भद्रघटोपरिणामेन भगवतीं वसुन्धरां भावयेत्
सद्भुजा पीतवर्णा एकमुखा रत्नमुकुटधारणी
सव्ये प्रथमभुजेन निधिवारदं द्वितीयेन रत्नमंजरी
तृतीयेन तथागतवन्दनाक्षमालाधारी
वामे प्रथमभुजेन पूर्णघट द्वितीयेन धान्यमंजरी
तृतीयेन प्रज्ञापुस्तकधारणी ललितासनस्थिता
सर्वालङ्कार भूषिता नवयौवनसम्पन्ना
भगवती वसुन्धरा स्वरूपोऽहं भावयेत् ।

वसुन्धरा धारणी—

ॐ नमः श्री आर्यवसुन्धरायै । नमो भगवते श्री वज्रधर—
सागर निर्घोषराज तथागतायार्हते सम्यक्सम्बुद्धाय ।
तदचथा । ॐ वसुन्धरादेवी आगच्छ आगच्छ वसुधरायै
वरप्रदायै स्वपारार्थसाधने सर्वधनधान्य रत्न वस्त्रा—
लङ्कार सर्वोपकरणैः समृद्धि मे देहि
शान्तिं कुरु पुष्टिकुरु सर्वारिष्टं शोधय शोधय
शीघ्रं सर्वसिद्धिञ्च ददापय स्वाहा ।

तिब्बती परम्परागत बौद्धधर्म अनुसार "सुङ्धुई" नामक धारणीसंग्रह
ग्रन्थस उल्लिखित आर्यश्री वसुन्धरादेवीया धारणी प्रस्तुत याना च्वना—

ॐ नमो भगवते वज्रजसागर निर्घोष तथागतायार्हते सम्यक्
सम्बुद्धाय । तदद्यथा । ॐ शुभे भद्रव्ये । बले । मङ्गले अचले अचवले ।
उद्गति । स्वभावते । धनवति । शुभवति । प्रभावति । विमले ।
निर्मले । सुरूसुरूवे । सर्वमले । विमले । निर्मले । अचनते । अनन्ते ।
विनमते । विशकेशिनेशि । अंकुरे । मंकुरे । प्रभंकरे । विरमे । विधमे ।
रिरिमे । धिधिमे । धुधुमे । लखमे । ततखमे । तरतर । तर । वज्र
वज्र । वज्रोभवे । तकेतके । तकेतके । थकेथके । उकेउके । थके ।
थरके । अपतनि । पर्शनि । नेत्रघनि । सागरनिर्घोषाय । मनुस्मरस्मर ।
सर्वसत्त्व । तथागतसत्य मनुस्मर । धर्मसत्य मनुस्मर । संघसत्य-
मनुस्मर । तटटट । पुरपुर । पुरयपुरय । भरभरनि । अमल ।
सुमंगले । शान्तमति । शुभमति । मंगलमति । महामति । भद्रमति ।
प्रभमति । सुचन्द्रमति । आगच्छ । आगच्छ । समयमनुस्मर स्वाहा ।
अपरन मनुस्मर स्वाहा । प्रभमनुस्मर स्वाहा । धितिमनुस्मर स्वाहा ।
छेदमनुस्मर स्वाहा । जम्भय मनुस्मर स्वाहा । हृदय मनुस्मर स्वाहा ।
सर्वसत्यमनुस्मर स्वाहा । ॐ वसुधरे स्वाहा । ॐ श्री वसुस्वाहा ।
ॐ महावसु स्वाहा ।

वसुन्धरा चर्यागीत—

षट्भुज । रागललित । तालभप ।

षट्भुज एकमुख भद्रघटधारी
धान्यमञ्जरी पुस्तकवामे २
निधिदरशन रत्नमञ्जरी
सर्वजिनवन्दित दक्षिणहस्ते । ३ ।
नमामि २ श्रीवसुन्धरादेवी
रत्नाभरण भूषिता
कनकवर्ण रत्नमुकूटमणि

ललितासन द्वात्रिंशहरणं ।
 उद्धर्तथागत दक्षिणलोकेश्वर
 वामवज्रपाणि इलादेवी
 जम्बलजलेन्द्र नीलवर्ण
 नामवरुण शुक्लवर्ण
 चिबिकुञ्जलि केलमालिनी
 मुखेन्द्रदेवी शुभधारी
 चामर छत्र ध्वज पताक आदि
 हस्तेधारी चतुरदेवी
 पूर्णामाणिभद्र दक्षिणपूर्णभद्र
 पश्चिम धनदा वैश्रवणा
 गुप्ता सुगुप्ता सरस्वतीदेवी
 चन्द्रकान्तार मोक्षप्रदा
 सगणमण्डल पूजितं ये
 भूगुति मुगति भवन्तु ते । ध्रु ।

बंभववसुन्धरा चर्यागीत-

रागललित । तालभूप ।

बंभववसुन्धरा पीतवर्णमेकमुख विचित्राभरण भूषणीया २
 कनकभद्रघट वामकरधारी दहिन अभयमुद्रा श्वेताम्बरा २
 ॐ वज्रीभव हूँ आरसातल अस्त ॐ वज्रदृढ तिष्ठमेदनी २
 मेदनीवज्रीभव वज्रगन्धहूँ विश्वभरण संपद निसारभवन्तु
 एह्येहि मातरि इदमर्घ पूजा ग्राह्यते वज्रसत्त्वपूजिते २
 मण्डलकर्मसु साधय २ शोधय २ ह्रीं हूँ अ स्वाहा २
 नौमि श्री धनदुहिते पादार्चिदे विविध उपहार पूजयामि २
 श्रीशाक्यसिंह मारवलभञ्जना देवी श्री वसुन्धरा मण्डलं लिखामि
 सद्गुरुचरणकमल शिरसा धरिया गावन्ति आचार्य संघ सयरा २
 भूमिशोधननिधि तस्य फलप्रदं सर्वसत्त्व हिया संसार तरणं । ध्रु ।

धनकरी वसुन्धरा चर्यागीत—

रागशृङ्गार । तालभूप ।

धनकरी सागरधान्य ब्रीहि मण्डल माभेस्थितयन वसुन्धरी २
श्रीलक्ष्मीधनेश्वरी गुणनिधि श्रीवज्राचार्येण २
ततोमन्त्रन्यास
मण्डल धितिया २ पूजनया लक्ष्मी भवतारणीदेवी
पीतवर्णा एकमुख षट्भुजया २ ललितासन
दहिनवर रत्नमञ्जरीता २
वज्रधरसागर गुरुशिरसा वामकरस्थित सुवर्णकलश २
धान्यमञ्जरी प्रज्ञापुस्तक मणिमुकुट शिरस व्यपिनी धारिता २
दिव्यरूपी अवतारणी चित्राभरण विविधरत्न भूषिता २
दिव्यरूपी भवतारणी चिन्तामणि धारिता ज्वलितमय वामस्थिता
वज्रपाणि लोकेश्वर दहिन जमवरूपा २ इन्द्रादिदेवगण
लोकपाल सहिता २ श्रीगुरु भास्कर वज्राचार्येण चिता । ध्रु ।

वसुन्धरा स्तोत्र (नेपाल भाषं)

हे देवी जननी वसुन्धराप्रभु शरण वया जि न्हिथं
दुःखीया उपरे कृपा तइम्ह मां नित्य जिनं वन्दना ।
हाहाकार मचेजुया व च्वन स्व उद्धार याइपि महु
थ्व लोके मुख शान्ति जुइगु याकनं याना विज्याहुँ छिस्
थः नये थः त्वने बाँलाके थुलि विना छःपिगु सेवा मया
भिगु मार्ग कयना विज्याहुँ याकनं स्वया सुदृष्टि थन ।

स्वामि प्रभुया लये वसुन्धराया स्तुति (नेपाल भाषं)

धन्य प्रभु धनेश्वरी वसुन्धरादेवी
माया म्हासु वर्णा खः दथुई च्वंगु ख्वाल
छःपि सुनां लुमकी वया धन दई
न्हिया न्हिथं छिगु पाली नमस्कार याना

छःपि हानं जवपाखे महालक्ष्मीदेवी
स्वस्वं मगागु कुंकुम खवे अति तेज
माता धका सुमरण याई ज्ञानीपिसं
ह्लिया ह्लिथं छिगु पाली नमस्कार याना
१२।

ख्वाःपा हानं खवपाखे सुकुमारीदेवी
थियां थिये मफूगु मिं थें अति ह्यांगु वर्ण
अष्टसिद्धि फल बिया बिज्याम्ह माता
ह्लिया ह्लिथं छिगु पाली नमस्कार याना
१३।

दचोने च्वना कापलेया खुका ल्हाः ब्वयेका
स्वंगः मिखां स्वत अहो गुलितक बाँला
पञ्चोपरी बिज्यानाव ललितासन सो
ह्लिया ह्लिथं छिगु पाली नमस्कार याना
१४।

शीलयागु म्हामु वसः तीलहीलं तिया
ल्हाःजवं वर बिया ज्वलान्हेकं ज्वना
पाप फुना वनी धका हिल जपमाला
ह्लिया ह्लिथं छिगु पाली नमस्कार याना
१५।

हस्तखवं घट ज्वना वागुई हानं क्यना
ज्ञान दया वई धका सफू तन्त्र क्यना
प्राणीपिनि मन स्वया वरदान बिया
ह्लिया ह्लिथं छिगु पाली नमस्कार याना
१६।

सत्ययुगे वज्रदेवी सत्त्वपिन्त स्वया
त्रेतायुगे वसुन्धरा धायकाव क्यना
अनं लिपा द्वापरस महालक्ष्मी जुया
ह्लिया ह्लिथं छिगु पाली नमस्कार याना
१७।

वहे प्रभु कलियुगे वरदाकुमारी
 प्यंगु युगे प्यम्ह जुया प्यंगु रूप कयना
 जन्म जराव्याधि महामृत्यु दुःख फुका
 ह्लिया ह्लिथं छिगु पाली नमस्कार याना
 १८।

थुगू स्तुति सुनां व्वनी वया
 सर्वपाप नाश जुया
 नरकस वनेमाली मखु
 महाधनी सुखी जुया मोक्ष वनी
 ह्लिया ह्लिथं छिगु पाली नमस्कार याना
 १९।

थुलि पं. गणेशराज वज्राचार्य रचित स्तुति जुल ।

वसुन्धराया बाखं म्यें (नेपाल भाषं)

शरण महालक्ष्मी वसुन्धरा प्रभुया चरणे दानशील तया ।ध्रु।
 जवयागु ख्वाल कुंकुम वरण खवयागु ख्वाल ह्यंगुलि वरण
 दथुयागु ख्वाल म्हासुगु वरण सुरज समानं तेज थिना च्वम्ह ।ध्रु।
 ११।

रत्नयो मटुक शिरस पुयाव प्रथमगु ल्हातं जपमाला ज्वना
 द्वितीयगु ल्हातं ज्वलान्हेकं ज्वना तृतीयगु ल्हातं अभय वर विया ।ध्रु।
 १२।

खवपाखे प्रथम पुस्तक ज्वनाव द्वितीयगु ल्हातं वागुई ज्वनाव
 तृतीयगु ल्हातं कलश ज्वनाव दुःखीया उपरे करुणा तयाव ।ध्रु।
 १३।

रत्नयामाला तिस्रा जुल वसया कलशया द्योने आसन यानाव
 दुःखी जन प्राणी उद्धार यायेत स्वंगुलि रूप कयाव बिज्यात ।ध्रु।
 १४।

थव मचा सरिका प्राणि लहीना अन्न धन रत्न परिपूर्ण विया
 षट्गतियोनी गुलिदु प्राणी थव मचा भालपाः मोक्षपद विया ।ध्रु।
 १५।

महाप्रतापी सूर्योदय राजां प्रजागणपिन्त विचार मयाना
पापस भुलेजुया धर्म मयाना जलवृष्टि मनुया प्रजां दुःख सिया ।ध्रु।

।६।

देवदेवीगण ब्रह्मा विष्णु महेश्वर प्राणीया दुःख कष्ट खनाव
तुषिता भुवने वसुंधरा देवीया चरण कमले विन्ति यनाव ।ध्रु।

।७।

माता जननी वसुंधरादेवीं ब्रह्मघोष नन्दीमुख थव दासी सता
सूर्योदय राजा बोध यानाव तीलाग्रत दनका उद्धार यानाव ।ध्रु।

।८।

देवीयागु आज्ञा शिरस तयाव सुन्दरी मिसायागु रूप कयाव
सूर्योदय राजाया चंडिकास्थाने लोक मोहयाना में हाला च्वन ।ध्रु।

।९।

प्रजागण वना राजाया हवूरे मिसा निम्ह वया में हाला च्वंगु
विनति यानाव प्रजा ल्याहाँवन जुजुया मनस धंदाकया च्वंगु ।ध्रु।

।१०।

मिसात वयाव में हालाच्वंगु भिनीमखु अवश्यं गथे यायेमाल
आकाश मार्ग मि दनाव वल प्रजा सकले हाला खवया जुल ।ध्रु।

।११।

देवीगण निम्ह मिसा रूप तोता सुन्दरी वराहया रूप कयाव
जुजुया पियारी अशोक वगैचा तलाउ सहितं विध्वंस थनाव ।ध्रु।

।१२।

महा प्रतापि सूर्योदय राजा विरह तापं महाक्रोध जुया
घंटाघोषण नगरस यात वराह लायेत वयेमाल प्रजा ।ध्रु।

।१३।

उत्तरे प्रजागण दक्षिणे मन्त्रि पश्चिमे सेनापति पूर्वे राजा
प्यंगुलि दिशासं च्वनेमाल पहरा मुखें विस्युं वने सजाइयाई राजां ।ध्रु।

।१४।

देवी स्वरूप सुन्दरी वराह सल्हाः जुल निम्हस्यां वने गुगु द्वारं
दुःखसिई प्रजां सजाइयाई राजां वनेमाल भीषि जुजुयागु द्वारं ।ध्रु।

।१५।

(४७)

निर्मल आकाश खने मद्रु सुपाचं अन व थन मदेक जुल अन्धकार
देवी स्वरूप सुन्दरी बराह निम्हं विस्म्युं वन जुजुयागु द्वारं ध्रु॥
१९६।

लिनाः यन बराह लाये घका राजां सल गयाव धनुष ज्वनाव
दूर वन थ्यका सुन्दरी बराह सलयाके दुबिना जुजु हीके यन ध्रु॥
१९७।

अर्घोर जंगले सिमायागु क्वसं जुजु तोता देवी निम्ह वन
दुःख जुल जुजुया लुमन प्रजा सुं मद्रु अन चिरूवादार खन ध्रु॥
१९८।

लख त्वने तृष्णा जुल राजाया अहोयाना छवत चिरूवादार वन
जुजुयागु आज्ञा शिरस तयाव लख माल वं वं सुरनदी थ्यन ध्रु॥
१९९।

सुरनदी तीरे अपसरागणपि म्हासु वस्त्रं पुनाः व्रत दना च्वन
चिरूवादारया नाम सेन धयाम्ह अपसरा नापं व्रत दना च्वन ध्रु॥
२००।

जलप्रसाद ज्वना ल्याहाँवया जुजुया न्ह्योने विन्ति याना कन
जुजु खुशि जुया सल गया सेन न्ह्योने तया स्वयेत विज्यात ध्रु॥
२०१।

अपसरागणपि सुं मखनाव सूर्योदय राजा विरहन्तं खल
आकाशवाणि देवीपिसं धाल सेन गुरू याना व्रत दनेमाल ध्रु॥
२०२।

धन्य धाये कर्म सेन गुरूयागु धिकार धाये सो जिगु कर्मयात
न्हापायागु जूनी पितावया मदुगुलि देवीया दरशन याये जि मखन ध्रु॥
२०३।

देवीयागु आज्ञा शिरस तयाव थव सेन सहितं सलयाके गया
सेन न्ह्योने तया जुजु ल्यूने च्वना श्रीनगर थःगु देशे ल्याहाँ वया ध्रु॥
२०४।

थोकांपिने सल तोता सेन न्ह्योने तया भारादार ल्यूल्यूतया दरवारे वन
सुवर्णाया भारी चूतदेवी ज्वना लुखास दना च्वन तुति सीकैयात ध्रु॥
२०५।

प्रथम न्हापां सेनया तुतिसीकि लिपा तुतिसीकि रानी जिगु छनं
प्राणपियारा प्रभु स्वामी जिनं गथे तुतिसीकेगु थव सेनयात ।ध्रु।
१२६।

छाय् ग्याना रानी तुतिसीकेयात थगु खँ सकतां कने जि छिमित
जुजुया हुकुमं सेनया तुतिसीका थव स्वामी सहितं अन्तपुरे वन ।ध्रु।
१२७।

सेनगुरूयात देवीं घया हःगु दुःखया वेदना रानीयात कन
देवया विहारे सेन गुप्तयात शुभयोग दिने चूडाकर्मयात ।ध्रु।
१२८।

सछि च्याम्ह प्रजा राजारानी नापं सेन गुरू याना तिलाव्रत दन
चूतदेवी रानीं अभिमान याना देवीयागु व्रतका चःचः फुनाछोत ।ध्रु।
१२९।

वनस पितिना तयातम्ह रानी निम्बदेवीयात सिद्धा काल वःम्ह
न्हापायागु जूनी पिनावगु दुम्ह चेतिनीनं व्रतका लानाकया यन ।ध्रु।
१३०।

हर्षनं चेतिनी व्रतका ज्वनाव निम्ब वने वना रानीयात
यायेमाल भीसं देवीयागु व्रत दुःखया समुद्रं पार जुई भीत ।ध्रु।
१३१।

गथे याये चेतिनी व्रत दनेयात सराजाम भीके दुगु मखु छुं छुं
वनया दथुस जि चवना भिखाछें जिथेंजाम्ह दुःखी दइमखु सुं सुं ।ध्रु।
१३२।

रानी जि धायेका सिद्धा पवनाहया रक्षा यानाचवना जि थव प्राणयात
मिखास ख्ववि तया चेतिनीनं घाल दुःख तायेमते रानी कर्मया भोग ।ध्रु।
१३३।

हायहाय देव गथिजागु कर्म जि पापी म्वानाचवने सिनावने भीन
पूजाजोलं सकतां श्रद्धाभावं देका सिमाहल अर्घयाना व्रत दनाचवन ।ध्रु।
१३४।

देवी वसुन्धरा वृद्धी रूप जुया भक्तजनपिंगु चित्त स्वये यात
चूतदेवीयागु लुखास बिज्याना अजिमाजु वल धका खबर कनाछ्वत ।ध्रु।
१३५।

चूतदेवी रानीं महाक्रोध याना बृद्धी रूप देवी पतिनाव छ्वत
निम्ब बने चवना व्रत दना चवंह निम्बदेवी रानीया थास बिज्यात ।ध्रु।

।३६।

निम्बदेवीयागु लुखास बिज्याना अजिमाजु वयाधका रानी सःताचवन
निम्बदेवी रानी बृद्धी रूप खना आदर भाव तया दुत ब्वना यन ।ध्रु।

।३७।

निम्बदेवीयागु भक्तिभाव खना देवी वसुन्धरा प्रसन्न जुया
मण्डलया दथुस देवी बिज्याना निम्बदेवीयात दर्शन बिया ।ध्रु।

।३८।

बियेधुन छंत स्थीर जुई सदां घंदा कायेमते रानी मोक्ष याये छंत
त्वःतेमते धर्म, यायेमते पाप चवनेदइ तुषिता भुवनया वास ।ध्रु।

।३९।

माता वसुन्धरा अन्तर्ध्यान जुया तुषिता भुवने थाहाँ बिज्यात
सूर्योदय राजाया लुमन रानी निम्ब बने दुःखसिया चवंह ।ध्रु।

।४०।

थव दासी सःता अह्येयाना छ्वत महारानीयात ब्वना ह्येमाल
निम्ब बन छगुलीं लुं वह्या खानि जुयाचवंगु सकतां दूतं कंवल ।ध्रु।

।४१।

सूर्योदय राजां थुगु खबर न्यना भारदार सहितं स्वयेत बिज्यात
देवीयागु प्रसादं जुयाचवंगु सकतां थव स्वामियात बिति याना कन ।ध्रु।

।४२।

सूर्योदय राजां ल्याहाँ मवयाव चूतदेवी रानी महाक्रोध जुल
निम्ब बने वंह जुजु सःतेयात खुसिया किनारे रानी थ्यंक वन ।ध्रु।

।४३।

देवीयागु स्वान खुसी च्वीकेहःगु चूतदेवी रानी हाचांगाया वन
देवीयागु स्वान हाचां गागु पापं चूतदेवी रानी कोलमुखी जुल ।ध्रु।

।४४।

वना वना थास लोकं हाहायाका फाख्वाल चूतदेवी वनं वनं जुल
फाख्वाल चूतदेवी रानी वनं वनं जूजु निर्भल पुखू निगू नापलात ।ध्रु।

।४५।

(५०)

पुखुलिनं न्यन गन भाये तना भाग्यया फलं थौ छित नापलात
श्रीनगरदेश वया जि थुगुल वसुन्धरा देवीया दर्शन यायेत । ध्रु ।
१४६।

पुखुलिनं धाल देवीयाके न्यनाव्यु हाय्न्हिथं जिपि त्वाना च्वनेमाल
अनं दुहाँ ववं वराह नापलात म्ह चासुकाव बुतुबुला च्वंम्ह । ध्रु ।
१४७।

वराहनं धाल देवीयाके न्यनाव्यु छु पापं म्हं चासुका च्वनेमाल
अनं दुहाँ ववं सुचीमुख नापलात म्हुतु चिकिप्वाल प्वाः तग्वःम्ह । ध्रु ।
१४८।

सुचीमुखं धाल देवीयाके न्यनाव्यु छाये पित्याका जि च्वनेमाल
अनं दुहाँ ववं कर्मभूमी थ्यन थमं याना पाप भोग याना च्वंपि । ध्रु ।
१४९।

पापीतस्यं धाल देवीयाके न्यनाव्यु छुयाना पापं कष्ट नयेमार्नि
भाग्यया प्रभावं कृष्णसर्प वया रानीयात न्यायेत लितुलिना जुल । ध्रु ।
१५०।

रानी नापलाका ख्वाले धसे यायेवं न्हापाया स्वरूप रानीयागु जुल
अनं दुहाँ ववं हिसिमा खना खाना नये मति तया हिसि खायेतेन । ध्रु ।
१५१।

हिसिमानं धाल थियेमते पापीनी जिनंतु छंगु ल्हाती कुतकाव बिये
हिसिमाया प्रभावं खुत्तिया किनारे चुतदेवी रानी थ्यनकल वन । ध्रु ।
१५२।

मुवर्णया घलस लंख थना च्वंपि अपसरपिन्त रानी खना न्यन
छाये लंख काल वया छिकपिसं अपसरां धाल देवी स्नान याकेत । ध्रु ।
१५३।

थ्व गंगास स्नान याः फइ छंगु पाप देवीया दर्शन लाई निश्चय छंत
देवीयागु दर्शन दत्त रानीयात अपसरां धाःथें गंगा स्नान याना । ध्रु ।
१५४।

देवीयागु पाली रानी भोसुनाव मिखां खोविधारालंख हायकाव
थम्हं याना पाप फुक्क लुमंका दुःखयागु वेदना देवीयात कन । ध्रु ।
१५५।

स्वयैमते रानी छाये घदा कया दुःखया समुद्र पार याये छंत
देवीया पालीस रानीं बिनियात लैस वयाबले पापीतस्यं धाःगु । ध्रु॥

॥५६॥

देवीयाके न्यनाब्यू छु यांना पाप थथि जागु कष्ट नयाचवने माःगु
थुगु थुगु पाप कष्ट नया चवंगु यांना वल अमिसं न्हापायागु जूनी । ध्रु॥

॥५७॥

गथे जि कना अथे छनं कनाब्यू अमि पाप फुना तरे जुया वनी
याये जुल जिनं देवीयागु व्रत थव जीवन दतले त्वते मखुत । ध्रु॥

॥५८॥

देवीयागु पाली नमस्कार यांना हर्षनं बिदा कया थव देशे वल
रानी ल्याहाँ ववं कर्मभूमी थ्यन देवी धया हथे पापीतयूत कंगु । ध्रु॥

॥५९॥

परस्त्रीगमन जीव हिसा पाप मेवयागु द्रव्य हरेयांना काःगु
मिले नुया चवंगु फायाब्यूगु पाप करपिनिगु नुगले स्याक बोलि ल्हागु । ध्रु॥

॥६०॥

यांना वल छिमिसं न्हापायागु जूनी उलि कने मात्रं तरे नुया वंगु
अनं ल्याहाँ ववं सूचीमुख खना देवी धया हथे वयात नं कंगु । ध्रु॥

॥६१॥

न्हापायागु जूनी ब्राह्मण जुया दान धर्मयाःपिन्त निन्दा यांना जूगु
थमं जक न्यंगु यांना चवंगु पाप मेवयात छिद्र बोलि ल्हाना जूगु । ध्रु॥

॥६२॥

छ यांना वःगु न्हापायागु जूनी उलिकने मात्रं तरे नुया वंगु
अनं लिहाँ ववं बराहयात खना देवी धया हथे वयात नं कंगु । ध्रु॥

॥६३॥

न्हापायागु जूनी भण्डारे जुया मेवयात नकेत नुग स्याना जूगु
करपिनिगु आत्मा स्याना जूगु पाप सुनानं मखंक थत कया जूगु । ध्रु॥

॥६४॥

न्हापायागु जूनी छ यांना वःगु उलि कने मात्रं तरे नुया वंगु
अनं ल्याहाँ ववं पुखु निगु खना देवी धया हथे अमितनं कंगु । ध्रु॥

॥६५॥

(५२)

न्होपायागु जुनी तता वयेहे जुया नये तोनेबले ल्वातु ल्वाना जूगु
उकीयागु पापं थुगुलि जन्मे पुखु निगू जुया ल्वाना च्वनेमाःगु ।ध्रु।
॥६६॥

न्होपायागु जुनी यानावःगु छिमिसं उलि कने मात्रं तरे जुया वंगु
मायां मोह तोता पाप नाश याना चूतदेवी रानी थव देशे वल ।ध्रु।
॥६७॥

थव स्वामियात खबर कना छवत भारदारसहितं जुजु थ्यंक वल
स्वामीयागु पाली रानीं भोसुनाव मिखान खबिधारालंख वःथें हाल ।ध्रु।
॥६८॥

खोयेमते रानी छु जुल छन्त रानीया छ्यने ज्वना जुजु थना बिल
गुलि दत छन्त माला जुया जिनं गथे जुल छन्त गन वना च्वना ।ध्रु।
॥६९॥

भाई भारादार न्ह्योने ल्यूने च्वना थव नापं रानी तथा दरबारे हल
होला वल तायेस्वाँ थासथास पतिकं इयालि मृदंगा बाजं थाना हल ।ध्रु।
॥७०॥

दरबारे थ्यंका चेतिनीनं तुति सीका हर्षनं रानी अन्तपुरे वना
देवीया दर्शन याना वःगु सकतां थव स्वामीयात विन्ति याना कन ।ध्रु।
॥७१॥

तीला व्रत दनेगु दिन तेल स्वामी सरज्जाम सकतां जोरे याये माल
व्रत दनेयात सराज्जाम माःगु तथार यानाव रानीयात बिल ।ध्रु।
॥७२॥

तन मन बोली एकचित्त याना देवीयागु मूर्ति नुषलस तथा
सछि च्याम्ह प्रजा रानीया नापं तीला व्रत दन सेन गुरू आत्ता ।ध्रु।
॥७३॥

वइ मखु नापं थव धन सम्पत्ति वाना थके मानी छन्हुयागु दिने
अनित्य मोहसं गुलि सुख याये देवीया व्रत याना तरे जुया वने ।ध्रु।
॥७४॥

माता वसुन्धरा प्रसन्न जुया श्रवतजनपिन्त दरशन बिया
तुषिता भुवने थत व्वना यन पुष्प बिमाने सकसितं तथा ।ध्रु।
॥७५॥

श्रीशुभ संवत् दोलछिव न्येछि भाद्रव कृष्णया तृतीया दिन
दुःखि अनाथं चिनागु जुल ग्रन्थ प्राणि उद्धार याये कामनानं ।ध्रु।

।७६।

थुलि पं. देवानन्द वज्राचार्य विरचित बाखँ म्यें जुल ।



वसुन्धरा देवीया दाफा म्ये

[राग—मालश्री / ताल—चो]

कांचन वर्ण कमल नयन देवी त्रिभुवनया तारणी ॥
मणिमय मकुट अनेक अलंकार तियाव अति शोभा लाक ॥१॥
हे जननी देवी वसुन्धरा माई हे ॥ध्रु॥
जवन अभय रत्न मञ्जरी जपमाला जोनाव बिज्याक ॥
खवन कमण्डलु घाङ्मंजरी प्रज्ञा पुस्तक जोनाव ॥२॥
हे जननी देवी वसुन्धरा माई हे ॥ध्रु॥
छगुलि रूप नं स्वंगुलि रूप क्यंसे सृष्टि स्थिति पालन यास्य दिल ॥
दारिद्र दुःखि सोस्य भुगुति मुक्ति बिस्य ललिताशन यास्य दिल ॥३॥
हे जननी देवी वसुन्धरा माई हे ॥ध्रु॥
श्री वसुन्धरा देवीया चरणस धर्मराज नं ल्हाक ॥
ल्हाकम्हया करजोरि बिनति कोति कोति याहुन्य जगत उद्धार ॥४॥
हे जननी देवी वसुन्धरा माई हे ॥ध्रु॥



गातिला गुथिया छगू तालपत्र अभिलेख^१

प्रत्येक वर्ष भाद्र महिनां न्यायेका वइच्चंगु अतिकं प्रसिद्धगु श्री वसुन्धरायागु व्रतधर्म गातिलाधलंगुथि विषययात कया छगू ताल-पत्रस थथे उल्लेख याना तइतःगु दु— श्रयोऽस्तु सम्बत् ५५२ फाल्गुण कृष्ण अष्टमिया दिन खाय्बहि लिविछें वतास च्वंम्ह प्रजापति अभय व पात्रवंशि थकूजुयात बियागु दम्मगुं व— शिवका धइगु प्यतका दामं नीप्यंगः २४ कलश तथा धर्मदनीपिन्सं चलेयायेमाःगु थितिबन्देज जुल । थुगु बन्देज दय्दसँ परम्पराकथं बुंया आयस्तानं बांलाक चलेयाये माल । थुगु दामं न्हापायागु थिति अनुसार थवं थः आदरपूर्वक सुथिहारछिसिनं म्हति निफा वा ल्हापं बियेमा । थुगु पत्रस विस्तार खँ मच्चया । थुकिया धनी श्री पृचोबहीया ब्रह्मचार्य भिक्षु श्री अखयथि थपाजु गातिला-गुथिया प्रमुख जुल । थुकिया साक्षि श्री छाज बाहाःया जयसिंह श्रेष्ठ-यात तथाः प्रमाणित याना बिया । शुभम् ।

१. थुगु अभिलेख च्वमिया थःगु संग्रहले सुरक्षित यानातःगु दु ।



वसुन्धरादेवीया १०८ ता नां

१) दिव्यरूपी	२७) सर्वाभरणभूषिणी
२) सुरूपी	२८) दुर्दान्त
३) सौम्यरूपी	२९) त्राशिनी
४) वरप्रदा	३०) भीमा
५) वसुन्धरी	३१) उग्राउग्र
६) वसुधारी	३२) पराक्रमा
७) वसुश्री	३३) दानपारमितादेवी
८) श्रीकरावरा	३४) वर्षणी
९) धरणी	३५) दिव्यदेवी
१०) धारणी	३६) निधान
११) धात्री	३७) सर्वमांगली
१२) शरण्या	३८) कीर्तिलक्ष्मी
१३) भक्तिवत्सला	३९) यशःशुभा
१४) प्रज्ञापारमिता देवी	४०) दहनी
१५) प्रज्ञाश्री	४१) मारणी
१६) बुद्धिवर्द्धनी	४२) चण्डी
१७) विद्याधरी	४३) ईश्वरी
१८) शिवा	४४) शवरी
१९) शूष्मा	४५) कृतान्तत्राशनी
२०) शान्ता	४६) कौमारी
२१) सर्वमातृका	४७) विश्वरूपिनी
२२) तरुणी	४८) वीर्यपारमितादेवी
२३) तारणीदेवी	४९) जगदानन्दलोचनी
२४) विद्याप्रदायिनी	५०) तपस्विनी
२५) भूषिता	५१) उग्रतारा
२६) भूतमाता	५२) ऋद्धिसिद्धिवरमुद्रा

५३) धन्या	८१) भिन्निनी
५४) पुण्या	८२) ब्राह्मिणी
५५) महाभागा	८३) वेदमाता
५६) अजिताजिता	८४) गुह्यवासिनी
५७) विक्रमा	८५) सरस्वती
५८) जगदेकहिता विद्या	८६) विशालाक्षि
५९) संग्रामतारणी	८७) ब्रह्मविहारिणी
६०) शुभा	८८) महारम्या
६१) क्षान्तिपारमिता	८९) वज्रिणी
६२) शीलनी	९०) कर्मधात्वेश्वरी
६३) ध्यानध्यायनी	९१) विश्वज्वालिनी
६४) पद्मिनी	९२) बोधिनी
६५) सुरवासनी	९३) मुक्तिसम्पन्ना
६६) शुद्धरूपी	९४) अद्वयाद्वयभाविनी
६७) महातेजा	९५) सर्वार्थसाधनी
६८) हेमवर्णा	९६) भद्रा
६९) चिन्तामणिधरी	९७) नष्टमार्गप्रदर्शनी
७०) प्रभाकरी	९८) वागीश्वरी
७१) निधानकूट आरूढासनी	९९) धनप्रदा
७२) धान्यागार	१००) योगेश्वरी
७३) त्रैधातुक महादेवी	१०१) मनोहरी
७४) दिव्याभरणभूषिता	१०२) सार्थवाह कृपादृष्टि
७५) सर्वबुद्धमातरी	१०३) महाकान्ती
७६) रत्नधात्वेश्वरी	१०४) प्रियदर्शिनी
७७) शून्यतारूपिनी	१०५) कृपादृष्टि
७८) वैनैयकी	१०६) सर्वजिनात्मकी
७९) प्रदायिनी	१०७) चतुर्दानप्रदायनी
८०) क्लेशछेदिनी	१०८) सर्वसत्त्वार्थदायिनी



न्हूबन्देजकथं वसुन्धरापूजा परम्परा

यलदेया धमं, संस्कृति, कलायागु संरक्षण व संवर्द्धन निम्ति भक्त-जनपिगु श्रद्धाभाव भक्ति आस्था जागरण तथा पुण्य अभिवृद्धि यायेगु तातुना इलय् बिलय् पर्वकालय् सामूहिक रूपं वाद्यवादन सहित उल्लास-मय वातावरणय् विभिन्न पूजोपकरण वस्तु सहित याना छायाबहः छायाः प्रदक्षिणा याःवनेगु धार्मिक उत्सवकथं जुलुस न्ह्याइगु गुगु परम्परागत प्रथा न्ह्याना च्वन धाय्कि— मतयाः, ओला, बाहाःपूजा, चीबाहाःपूजा, धर्मधातुपूजा, इत्यादि ।

थुगु इवलय् न्यायेका वइच्चंगु वसुन्धरापूजायानं थःगुहे किसिमं २०३३ सालनिसें न्हू थिति बन्देज जूगु जुल । थुकियागु लुमन्तिकथं थौतक नं त्वाःबाहाःया भक्तजनपि मुना अथवा व्यक्ति विशेषं वसुन्धरा-पूजा न्यायेका वइच्चन । थुगु पूजा मुनां मुनां पाःकया वन धौगु लुमन्तिया लागि श्रद्धालु दातापिगु नां सालमिति छसिकथं थन न्ह्यव्वया च्वना—

- १) तलाछि त्वाल निवासि आकाशदेवी उपासिकाया श्रीमान् सिद्धि-राज तुलाधर वि. सं. २०३३
- २) सिद्धिराज तुलाधर वि. सं. २०३४
- ३) सिद्धिराज तुलाधर वि. सं. २०३५
- ४) सिद्धिराज तुलाधर वि. सं. २०३६
- ५) रत्नाकर महाविहार [हःबाहाः] वि. सं. २०३७
- ६) पद्मावति महाविहार [नःबाहाः] वि. सं. २०३८
- ७) श्रीबत्समहाविहार [सिबाहाः] वि. सं. २०३९
- ८) रक्षेश्वर महाविहार [पूचोबही] मुक्तबहादुर धाखा वि. सं. २०४०
- ९) दत्तनाम महाविहार [दौबाहाः] वि. सं. २०४१
- १०) मयूरवर्ण महाविहार [भिच्छेबाहाः] वि. सं. २०४२
- ११) सप्तपुर महाविहारया च्यासःत्वाल वि. सं. २०४३
- १२) अक्षेश्वर महाविहार [पूचोबही] वि. सं. २०४४
- १३) नागबाहाःया तारेमाम संघ वि. सं. २०४५
- १४) सिद्धिराज तुलाधर तलाछि त्वाः, यल वि. सं. २०४६
- १५) चक्रवर्ण महाविहार [चुकबाहाः] रत्नराज वज्राचार्य " २०४७
- १६) ज्येष्ठवर्ण महाविहार [तंगः बाहाः] पन्नालाल शाक्य " २०४८
- १७) पद्मावति महाविहार [नःबाहाः] भीमराज शाक्य " २०४९
- १८) वैश्रवर्ण महाविहार [गुजिबाहाः] भीमराज " २०५०
- १९) सुरश्चन्द्रमहाविहार [न्हाय्कंबही] " २०५१

यलदेया वसुन्धरापूजाया धलः

१) क्वाबाहा	१	२३) थैना पालुबाहा	१
२) " अनसँ	१	२४) टंगबाहा	१
३) धपगाबही	१	२५) चुकःबाहा	१
४) कुलिम्बाहा	१	२६) तःबाहा	१
५) धुम्बाहा	१	२७) तःलाछि	१
६) च्यासः	३	२८) हौगःबाहा	१
७) चिकंवही	१	२९) जोम्बाहा चिवाहाननी	१
८) बुरमांबाहा	१	३०) जोम्बाहा	१
९) ओम्बाहा	१	३१) ईकुबाहा	१
१०) ज्योबाहा	१	३२) न्हायकंबही	१
११) सुबाहा	१	३३) दौबाहा	१
१२) गुईतःबही	१	३४) हःबाहा	२
१३) भिन्छेबाहा	२	३५) बूबाहा	१
१४) उकुबाहा	२	३६) नःबाहा	१
१५) तजः इछेबाहा	१	३७) शिबाहा	१
१६) उबाहाबही	१	३८) पूचवज्रजोगिनी	१
१७) महाबुद्ध	१	३९) पूचवबही	१
१८) ज्याथाबाहा	१	४०) पूचवअक्षेस्वरबही	१
१९) थपाट कुम्हा	१	४१) पूचवथूर फलेचा	१
२०) हितिफुसबाहा	१	४२) कोटलाछि	१
२१) गुजिबाहा	२	४३) ईलन्हे दिलक्व	१
२२) " वसुन्धराननी	१	४४) आलुको हिति	१

वसुन्धरा सम्बन्धी सन्दर्भ स्रोत प्राचीन साहित्य

- १) आर्यवसुन्धराकल्पसूत्र
- २) सुचन्द्रगृहपति कथा
- ३) सूर्योदयराजा कथा
- ४) विमलावती कथा
- ५) सुवर्णप्रभास सूत्र
- ६) स्वयम्भू पुराण
- ७) साधनमाला
- ८) साधन समुच्चय
- ९) अश्वघोषनन्दिमुखावदान
- १०) वसुन्धरामण्डल चित्र
- ११) वसुन्धरा व्रतपूजा विधि
- १२) वसुन्धरा अष्टोत्तरशत नामस्तुति
- १३) धारणीसंग्रह
- १४) तिब्बती दोमाङ्ग नामग्रन्थ
- १५) वसुन्धराया षट्भुज चर्यागीत
- १६) " वंभव नाम "
- १७) " धनकरी "
- १८) " तूतः
- १९) " दाफाम्ये
- २०) तिब्बती तथा मंगोलिया बौद्ध मूर्ति चित्रावली पुस्तक
- २१) तिला व्रत धर्म्मगुथिया पञ्जिका थ्यासकृ
- २२) नवग्रह मध्ये न्हापांगु शान्तिपाठ सूत्र



चवमिया आःतक पिदने धुंकूगु कृति

- १) नेपाल लिपि संग्रह
- २) बौद्ध विहार व ग्रन्थ सूची
- ३) बौद्ध शिक्षा प्रथम भाग
- ४) आर्यावलोकितेश्वर परिचय
- ५) बौद्धकला अनुसन्धान सूची
- ६) नेवारी वर्ण परिचय
- ७) कुम्भेश्वर इतिहास
- ८) लिपि विकास तालिका
- ९) नेपाल संस्कृतिया मूलुखा
- १०) लिच्छवि अभिलेख प्रकाश
- ११) कोलोफोन्स एण्ड इन्स्क्रिप्सन्स
- १२) रुद्रवर्ण महाविहार परिचय
- १३) भूपतीन्द्र मल्ल विरचित 'विक्रम चरित' नाटकयागु सम्पादन
- १४) स्थिरोभव वाक्य
- १५) बौद्धनाथस्तुप इतिहास
- १६) त्रिभाषायुक्त आर्यभद्रचरी
- १७) मयूरवर्ण महाविहार इतिहास
- १८) नेपाल लिपि प्रकाश
- १९) माधिगल राजप्रासाद
- २०) पूर्वो छगू अध्ययन
- २१) इल्हने सम्यक्
- २२) बुद्धनूति छगू अध्ययन
- २३) आर्यनामसंगीति परिचय
- २४) श्री स्वयम्भू महाचैत्य
- २५) विशाधरी विजयेश्वरी परिचय
- २७) भास्करकीर्ति महाविहार यतखाः
- २८) रुद्रवर्णमहाविहार तालपत्र अभिलेख
- २९) डकुमेन्ट्स फ्रम दि रुद्रवर्ण महाविहार - सम्पादन
- ३०) हिरण्यवर्ण महाविहारया पिण्डपात्र अभिलेख
- ३१) सम्यक महादान गुथि
- ३२) वैश्रवर्ण महाविहारया संक्षिप्त परिचय
- ३३) श्री ५ महेन्द्र स्मृति अभिलेख
- ३४) आर्यनामसंगीति ताराशतनाम स्तोत्र भद्रचरी
- ३५) महाबुद्ध मन्दिर इतिहास
- ३६) यलया विहार चैत्य व धर्मधातुया सूची
- ३७) न्हूदया लसताय् भिन्तुना
- ३८) रुद्रवर्ण विहारया विभिन्न अभिलेख
- ३९) बौद्धविधि कथं मचा जंकु
- ४०) बुद्धमल्लोक्श्वर सांस्कृतिक पृष्ठभूमि
- ४१) न्हूदया लसताय् भिन्तुना
- ४२) इल्हने सम्यक् इतिहासया ज्याःबः
- ४३) बुंगमल्लोक्श्वर छगू शिनापत्र
- ४४) पूजार्पणया पुण्य प्रशंसा
- ४५) त्रिशरण गमन शिक्षा व धारणी पाठचर्या
- ४६) महायानी बौद्ध देवता नाम सूची
- ४७) धर्म संस्कृतिया बसुजा ज्वलं (सञ्चित)
- ४८) यशोधर महाविहारस्थित भञ्जुश्रीया छगू इतिहास
- ४९) चैत्यया थःगु आत्म कथा संक्षिप्त इतिहास
- ४९) आर्यश्री वसुधरादेवीया सांस्कृतिक पृष्ठभूमि संक्षिप्त परिचय



म्युजियमय् च्वंगु श्री वसुन्धरा देवीया धातुया मूर्ति

थाकू : संकटा प्रेस, टेबहाः, यैं । फोन नं. २२८२०८